

元
文
類



八和石
966
8



元文類卷五十二

墓誌

南京路總管張公墓誌銘

姚燧

公諱庭珍字國寶曾大考淵大考士明以武力再世為金千夫長
 家臨潢之牟州考輯北京都轉運使故又家北京公於次為中子
 沈性易直通毅辨彊綜經緯史尤長左氏春秋筮仕已存愛民利
 物志事先帝以典內帑受知先是高句驪不靖徙居海中江華島
 上遣使問何由且謂其貳服親擇廷臣可者即命公時年二十三
 至其國王禮事之甚恭書言吾歲入幣大國未嘗不謹臣職非與
 未臣而敵已臣而叛者比而大軍歲入邊劉吾人民奴吾子女有
 吾貨財感吾土疆吾是以捨衍而完險誠出甚不得已之謀非首
 鼠他圖為也未疏黃金以兩計白金以鎰計各千百數為壽又言
 誠以是懷懷之言歸聞之上幸止邊軍無歲入願歲幣外別入如
 今相壽者數歲歲為謝公勃然曰王以天子之使求貨來邪揮去

歸具道王言且保其國無他避掠徒耳上亦悟曰人歲入幣事之
又加兵罪之誠何以待不臣而敵已臣而叛者詔令軍止戍邊無
入掠自是完東夷室家父子無慮萬億計自將伐宋從至閩中留
爲安撫使施治兵間裏摩創殘外供仗糧不擾而集今上卽位中
統建元自將北伐以故先朝故臣熟西京入漠南路俾置傳驛兼
給餽餉至元四年授同簽吐蕃經略使兵裁叛離仁革狠頑渠酋
讐撓滋久安順六年授朝列大夫佩金符責貢安南時已徵天下
兵數十萬圍襄陽實爲蹶宋起本勳臣故相上與咨軍國謀不可
一日離側者皆出行省董師公至其國王立受詔公詰曰王行非
止違命於禮於利害且不熟知撥此邦人民土地不當天朝一總
管治皇帝不欲郡縣王地版籍王民聽其稱藩遣使諭旨德至渥
也且王以與宋輯睦緩急爲援今百萬之師長圍襄陽烏飛路絕
朝夕將拔席卷渡江覆其國都易如振槁王猶偃岸海徼恃爲唇
齒自矜尊高事且上聞天威小震無須遠召中國雲南十萬之師

再月可至視邱墟王廟草棘王庭者將不難爲其審策之王屈降
拜益慚憤將以兵恐公使力士白刃環衛公迺示怠弛袒寢一室
盡擲所懸箭弓刀槊付衛士聽汝何爲天暑渴甚每取江水以進
皆溫惡不可飲食及索井汲不許曰吾俗不相悅者多投毒井中
殺人公曰自我所求毒死不恨終汲飲食自是安南君臣多度公
者八年會公以安南貢至襄陽猶未拔卽授行省郎中承事勳貴
巉絕不阿惟見之營衛足蹟不及其門商較事宜言宏色厲或有
以凌驚見短者故右丞相史忠武公天澤解之曰是其爲心忠正
侃侃人也久親其人必實吾言十年襄陽下改省爲行樞密院以
勞遷中順大夫遙知歸德府行院經歷大軍南規渡江復行省公
復郎中俄降虎符襄陽路總管兼府尹毀城樓以完廟學散契軍
以惜月廩剗弊施宜當其後先明年改監郢復二州位安撫使上
捐魚荻之賦使人厭腥食家給蒸薪月發倉以贍餓乏視便輒行
事已劾聞十四年陞嘉議大夫監平江路位總管上郢復民間去

遮馬號送萬數其治平江考績亦最他路十五年改同知浙東道
宣慰使未行改大司農卿丁內艱時軍興法聞喪不得輒行乞犇
赴不報公願還所受制書爲民行省知不可奪歸之旋臚愕然金
玉美女色色無有惟文書衣被而已今中書省右丞相伯顏夙嘗
疑爲凌鷲者後顧爲深知公嘗語人曰諸將渡江無不荒貪獨予
與國寶清慎自持聞者以爲知言公家居四年又終外艱十九年
以才起復仍故官嘉議大夫南京路總管兼開封府尹至治之初
見星而出見星而歸凡前政積事留獄旬月剖擿皆出尤善發姦
伏有控鶴十餘輩比公至僦大第聚居二年黃金橫帶出入飲食
街陌縱橫人謂其真也公曰控鶴役在京師久此不行必劇賊也
密喻有司以意期三日盡致其黨索贓以來得金帛寶玉服玩典
質券契盈室鞠之皆款服物則椎埋所獲妻妾僕使皆掠民子女
或娼姬明日告曉市中皆杖死民駭其神捷闔境之食已聞未報
輒止稅勿輸明年河北大旱民流徙就饒及河朔數萬人郡縣畏

損戶罪謾以逃聞省部遣使分道邀之許發倉人給三月食還所
籍民聚謀曰吾得食三月負難歸重難勝鬻將何噉且各賣質田
廬而南至家何爲愁歎無聊若出一喙公謂其使曰斯民非賊河
南非別界皆聖上民社也非不知奉命不輒濟可以無罪誠不忍
老稚頓踣吾治甘受禍以活此民則下令諸津急濟果有以專行
上告者事下御史大夫卽治廉之境民皆曰吾侯賢牧其爲開封
明斷不阿可當今代包拯大夫察其無他簿責而歸奏寢不下秋
雨潦河決原武泛杞灌太康自京北東潞爲巨浸廣員千里冒垣
敗屋人畜流死公括商人漁子船百十艘又編木爲筏具糗糒載
吏離散四出往取避水升邱巢樹者所全活以口計無慮百千水
又齧京城入善利門波流市中晝夜董役土薪木石盡力以與水
鬪不少殺乃崩城堰之城害旣弭復大發數縣民增外隄防分直
爲三直役一月逃罰作倍起陽武黑石東盡陳留張怒河綿亘百
三十里如期三月隄防悉完以至元甲申七月二十日卒官舍年

五十六河南之民識與不識如喪其親戚家纔餘俸半月將歸墓
貧不能西開封市民雄財者戶賻之又遣子弟數百人持錢分程
具奠越別治洛陽五百里凡千里及潼關以其年九月葬安西府
咸甯縣洪同鄉少陵原都運公瑩之左夫人何氏溫淑靜端男子
三人岳提舉郢復魚湖崇西蜀行省宣使瑩未仕女子三人一適
太平州錄事韓和一適紀德信一適鞏思齊後三年其季太中大
夫諸蠻夷部宣慰使庭瑞以燧素知公求銘其墓辭曰
年五十六固不云天較齊蓋者孰謂壽考究其致之豈無以然國
苟有利棄身若捐東北雞林挈舟以使西南雕題登馬已至視數
萬里爲步切餘招麾兩王嗾臺指輿吐蕃曠狹化不犯令由積苦
勞至不延命壽也無稱世不爲臧死有可述短不害長襄陽軍謀
郢復民效已實已著猶其小小開封蠲租舟民于河電擊霆馳懸
躬禍羅下燭其忠繇明后聖老幹經摧霜風踰勁大浸稽天陸舞
龍蛇流死所餘邱木是家乃集舟航乃後以繼乃求以濟取置平

地穴俾摧防萬杵登登役不踰時隱其阜陵民流他疆我飫其食
我疆沴傷皆手援溺顛顛公哉人之騶虞彼饒婪橫目虎貙雖
古循吏列傳史冊載筆今功孰作爲匹少陵之原有坊其邱銘石
道周以禔諸幽

唐州知州楊君墓誌銘

姚燧

自盜殺阿合馬後桑葛使總制院結知世祖氣焰烜烜燦人倖進
者人賄其家或藉其一言以爲事從中下必中書官之者月無虛
旬每爲中奉大夫參知政事居寬所裁甚不得已如請乃簿所職
級干政者俟有問他日則引以爲稽其不利也一旦爲尙書右
丞相誣而殺之惟其子集賢直學士奉直大夫勛不孥自餘妻及
子景奴婢凡資業皆籍入縣官桑葛敗誅故奉訓大夫知唐州君
居簡始敢上疏列明其兄自部曹史主事省掾都左右司檢正中
舍郎中知府憲副侍郎宣同典外郡尙書吏曹參議中書御史中
丞參行省中省政與國宣勞爲時才臣章章在人口耳今賊國臣

不遠誅夷宜爲死者雪其非辜庶彰聖代日月高懸之明參知政事梁德珪以聞勅有司償所籍入而勛尋卒無子又哀景雖二子一女而疾廢于莘而女年及矣自燕攜大參商公左山孫企伊入壻其家自莘而唐纔一閱月而景卒意者景計未至與至而未之知到官四十日當元貞乙未十月三十日而君亦卒年止五十七嗚呼何天之不福中奉之家耶身戮一室瓦裂二子繼死一不後一有而弱君訟還所籍又爲求壻令恤廢姪之家處事變之極狃薄俗之囿少不失天理民彝之正爲弟爲從父從祖曰悌與慈雖古人復作有一尚之乎而天之報施者反如是也蓋君自筮仕試吏從萬夫長嚴忠濟從己未渡江後使交鈔庫曹州改南京轉運司知事以善其職從其司請陞經歷俄授從仕郎大名路總管府經歷尹范縣同提舉信州宣課遷承務郎浙西宣慰司經歷換承直郎上都留守司經歷遭事難爲身出任之官長有不相能必委曲調順如媒氏之合二姓始異而終同之凡此皆佐人出理者而

非其所自爲也惟范縣爲近民又壓於郡守有不伸及今爲唐若可以有爲而遽已此哀哉君字子敬姓楊氏漢弘農大尉震苗胄五世祖絢爲宋儀曹易州死於金兵生邦基秘書監爲金名士書畫兩絕人曰可與李公麟者埒以通奉大夫永定軍節度使致事生郊社署令皜自儀曹而下皆家燕皜生監歸德酒庭直避金亂居莘生澧君之考也君交人誠和視新識如故知傾賞歡樂之夫人梁氏二子二女翰林國史院檢閱官昇一未名女長適同縣士族王文讓季在室皇上卽位之年冬十一月詔修世祖三十五年實錄院置檢閱官其究覈故事職也而其末九年燧與侍讀高凝共總裁之昇也實當筆至元二十七年之一一年願與修撰而下半年其事已可見其文賢無忝面命矣由同官相驩故介其考唐州君先摯會從史院諸賢還進史上都及與之別未數月訃至期昇會葬莘經杖言曰昇惡逆不得見先人屬纊已抱終天之恨不得公銘亦不可復食息人世矣敢泣血請乃銘之曰

觀人之槩惟在其大大使可書其細已蓋嗚呼唐州其大何如流風不移天理篤居惟天於人若薄而厚雖所薄今將昌爾後人之識狹其中安知厚竟之求視銘異時

劉陽縣尉尉君墓誌銘

姚燧

閻宏少燧十七年識之七年矣走未嘗遇以凡士宏亦願遊吾門策所述焉始記銘其祖醫隱君墓于時尉瀏陽考府君不恙也今焉六年又求銘其墓嗚呼何兩君皆不及知而幸襟潛德其幽宏豈有見走文可以信後世然與走不讓為者則以答其為好私今故也君諱鼎吉字和卿醫隱長子其鄉其世其遷徙與醫隱所以教者皆見先誌以至元二十一年尉瀏陽二十六年受代三十年秋七月十七日卒年六十八僑墓長沙元配姚氏再配白氏二子宏掾省江西與蕃也四女一適郡人徒單全一適南陽高舉二在室孫男女三人宏將以明年五月庚寅歸葬其鄉先塋其自狀曰君幼耽誦記敏為文辭異其時它門兒者皆其小德削不致詳而

日勤於筆錄如易正義論語注漢紀傳舊唐傳治鑑節文選杜詩註十餘書亡慮數百萬言具藏吾家手澤尙新可以汗車牛未聞人有辨為者與學仕事人則從張公邦彥宣撫天平為四川行樞密院柴楨照磨用禮卿王博文薦出官瀏陽非賢不即與居母中憂廬墓毀悴杖而後起皆出處不苟倫理至篤者又曰君胸中廓廓無城府商古今人物成敗賢不肖必當其實諫友過不計嫌怨盡我責善樽俎之容粹如不流為詩千餘篇號訥齋以宏信愛必不誣親燧取筆之曰君喟然吾少厲志嗜學官止一尉殆天戲人者則不可也亦思尉為君行道資乎蓋尉有難為有利為江南大縣戶動十萬一尉兵額止於數十而押綱衛使恆抽其半又其身有疾疾喪婚之請其直司日不盈三二十輩盜逐不得必尉焉罪小則輟祿大而奪官是不白其力少不足以制姦而惟責其專印不職也是其所難凡尉一世同者而君有獨焉在令尉恆居縣禦寇無敢他遣而湖省犯法臣特遣數千里送所市紗羅京師賦出

非其口也入納非其手也市者顧不必送而顧必令不遣者送之
有司又大其尺度重其鈞權從而責其輕短不使得歸取償有司
必舉息立輸府又遣修航海戰艦欽廉人難其一君難其三此其
所由重困也其利爲者必求爲盜罪不抵死嘗墨其肌月呈身有
司者署使伺盜曰蛇之所塗蛇能知之吾使過耳口不言所旨使
自喻之彼方困拘罪籍一朝得交平民出入惟求圖報雖身爲盜
將不避爲况囊橐他盜顧指富室惟所便取坐受其有盜得其粗
我得其細擇世所其實不可形迹敗者歸之尉有司覈盜不得依
月日則杖尉兵一杖加一等三杖而止耳伺盜特尉權一時宜密
置無迹何及焉尉所輟祿幾何而伺盜資之什伯不貲也盜爲伺
盜忠臣伺盜爲尉忠臣又其巧者與隣尉交驩私要言曰吾得盜
必使誣汝縣富室曰嘗巢窟焉曰屢資給焉幸羅之獄足吾欲縱
之民惟知德吾耳汝得盜亦如是取償吾縣易地爲之胥相益也
其月縱兵歸詭代家人責入備直與名以兵備斂者又所得爲也

凡是數事今之尉者十出其半嗚呼尉乎禦盜歎師盜歎觀夫人
觸法肆行微倖未露悻人大語則君掩耳此倫拘拘恪恪自靖其
道不少萌憂不足休休吾心賢何如也是爲銘

薊州甲局提舉劉府君墓誌銘

姚燧

京山安陸屬縣也其尹承事郎兼勸農事劉德源以邑人安某爲
先來言曰先生世名篤古善文者聞今賢公卿之胄或不遠數千
里及門求表著其先烈者相踵也德源之治去先生之居四舍耳
心竊覲之我先人之位固不大昭於時如得先生銘則沒而名庶
延也因敘曰吾劉氏居龍興黑土坂者不知始何祖其諱與次又
不可考質先人始以函工賜田通州後以鍛製精堅他工遷彰德
院長尋官進義副尉徙平陽雜造局副使再官進義校尉爲使又
官敦武校尉薊州局使猶領於提舉司以勞深而資久也制以前
官超爲提舉俄病廢兄德淵嗣爲降同提舉德源同知許州實侍
而南以至元三十一年九月一日卒官舍年六十八願言必葬通

之樂村以其年十二月二十五日竊焉又曰嗚呼位有貴賤故功
有顯微我先人始以函工一朝而賜服五品其功則止善於其職
何顯之能為人子惟其考嘗愆於時者始不敢求以昭明否者其
欲遠其聞者亦豈異賢公卿胄之心也惟哀而允之燧曰凡今為
制天下歲程惟甲不領於工曹逕入太府縣官親考其苦良而黜
陟之衛士必賜而藏之家弊則持故賜求易使昇之新也臣有私
藏者罪死況私為者乃先人雖班雜職而縣官視以為要焉自常
工而跂之亦曰遇矣君諱智弟四人其次居二娶楊氏前卒一
年同穴樂村二男則同提舉與京山也女適太常寺管句李某銘
曰五兵皆賊人戰而恃以不殤惟函為扞焉爾如君二十始傳以及
疾廢為之二十年始曰千被被全一人亦千人矣其功亦豈曰微
孟子曰函人惟恐傷人由術推心君亦仁哉此其藏

廣州懷集令劉君墓誌銘

姚燧

大德戊戌燧遊長沙太原寓士劉致手所為文若將取正焉者走
何以荷之讀之盡卷賞其為辭清拔宏豔為之不已可進乎古人
之域既又自狀其先人懷集令之出處丐銘幽墟感其心將昭明
所生為敘之曰君諱彥文字子章年二十有八筮仕當中統三年
而知堂印乃出管句北京行省承發省廢而歸授徒其家將十五
年謂為無意於世之事會者耶當秦邸肇開與故丞相阿里公之
行省長沙也無不往干之會同知堂印者許楫為憲長沙言之丞
相丞相自省郎中故居若晚君來便宜版為椰之錄事羣盜竊發
無時芟夷未靖也君不忍夷其俗而苟簡於治為之四年又三年
始官進義校尉廣之懷集令羣盜滋張虔人民燔城郭以冒天誅
者肆無所忌官軍少不足為恃授鄉民兵雜而殲之格鬪屢劾徙
民保東山前募民闢田八租私廩者為米八百石一盡於餉增戍
之兵與遭寇之家峴崎艱梗炎瘴者四年以至元二十六年四月
三十日而竟卒是何宦之不達耶今卑官無要知堂印者去丞相

尋丈儼立案前護守終日不食須去晨而出暮而歸日必再至丞相家丞相出敕入奏無不與偕裕廟為燕王日當朝廣寒殿君立庭下問盞中何有君則曰堂印也索而發封玩之其親接如何其榮如何遇也如何皆他人取將相之資也一旦管句北京行省去丞相千里錄事于郴西南北京又數千里終乃令懷集於南海之濱其不寢近而逾遠者世恐無君匹也豈讀書一過千百言不忘力兼人射命中皆文武器略足以表見一時者有是賢人已不凌人人則怯之耶且求以剗物置干將鉛刀其前蒙稚猶知後鈍而用銛及論取士則以方者為徒足持己而圓者始周乎物故率棄明炳勁特者為不易馴使而顧錄拾荏弱而不自持者為善適俗而賢之君豈坐是也耶其邵子所謂陽在陰中陽逆行時之為也故平生之道刑家則多其功於政者僅此譬水在山東於溪壑崖谷之險不得犇放平衍為澮為川其溉潤不博者亦勢然哉君石州甯鄉人權殯長沙佛宇文有玉亭小稟祖開參元帥府軍謀考

汝欽妣馮氏郡君李氏三子致某某二女歸薛氏李氏銘曰
士久其窮觀守之篤吏極其遠試治之勩且中其年而卑其祿皆
彼蒼者陰厚其蓄抑不信之以昌爾續

故民鍾五六君墓銘

姚燧

繫鍾徙吉潁川自迫於靖康繹騷避吉而來岳世方四由元而富
仕明至實生文興叔進字郎行五六以族次凡是四世皆不位吁
哉五六遁迹市乃如天啟所狀事居家孝謹文縝嚴訓厥子俾
知義自奉殊貶忘勤勤基約以極豐其積此邦師之陶猗視居鄉
侃侃和以易不私其有善分施歲荒民饑閔瘡瘁發我廩庾飫老
稚崩梁壞塗撻石治至今行者賴其利己丑之閏月庚朏年六十
八世迺棄葬之三陽先墟比黃室之子南秀嗣南英南金又其季
一女結褵未決議男孫滿十女半是一庭變兮貫魚似椒聊蕃升
必天意豈憐之家久踣躓一朝起行當遐致況如南秀士服被下
及二季皆學仕始卑終高若登陞或者而宗由昌熾匍匐哀求銘

立誌伊誰成厥孝子志苟有善奚必門地漢民仲山凡豈異奮筆
發隱太史燧

彭澤縣尹姚君墓誌銘

吳澂

延祐五年秋予赴集賢八月次真州病未克進陝人姚紱數數詣
予所館一日言曰紱之先河中人金代嘗仕虢州因家于陝吾父
諱思恭字敬父至元間仕廣東宣慰司有海商被強盜誣執其仇
司官之貳右商逮捕牽聯三十人繫廣州獄事至司貳酷法以鞠
死者三之一存者誣服吾父知其冤會歲終吏牘互易所掌此獄
隸吾父即以寃狀白官不答時廣東得專殺貳命出囚于庭將施
刑吾父謂囚曰汝今就死囚畏懼不敢翻異貳令吾父署牘父曰
賊仗未完人命不可輕職可罷牘不可署貳大怒趣署逾急吾父
度不可已抱其牘踰牆走匿僧舍越五日梅州獲正賊賊仗悉具
械送以上貳慙恚暗默吾父引寃囚十九人釋之囚哭拜曰非姚
掾我輩死久矣自後獄有疑必畀吾父覆問平反者甚眾廣東考

滿簿宣之南陵丞劉莊鹽場尹峽之長陽提領采石鹽引所治民
理財俱有政績歸葬吾祖于陝受江州彭澤尹未任昨歲六月以
疾終于真州寓舍年六十六歷官將仕從仕至承務止痛惟吾父
孝友慈祥勸書諳律仕未顯達實志以歿紱將以明年秋奉柩附
葬鼎湖祖塋先生賜一言死不可朽而不肖孤送親之終庶其有
校乎予謂若父蓋良吏也廣東一事真有洗寃活死之功是可書
已承務君之考諱某監陝州酒稅妣某氏妻楊氏彭氏先卒後娶
蕭氏子紱紳女適真定李純皆彭出也銘曰

熊君佐墓誌銘

吳澂

富州之甲氏熊為盛而不一族橫岡之族其先知制誥龍圖公之
後繇鄙徙至諱之翰者早世其配周氏以姨之子為子實丞相京
文穆公之從孫諱禮娶從事郎王尉之女生四子仲諱大涇娶韶
州周守之姑生子二君佐諱師賢其長也幼敏悟長治進士藝馳

俊譽叔父貢士暨鄉先輩皆期其早達僅一試貢闈而科舉廢讀書娛親于山中至元壬午先廬燬隱城市十年父既沒養母逾盡歡大德辛丑築室還故鄉扁其堂曰寓樂與老梅疏竹叢桂幽蘭細蒲怪石俱便坐掃地焚香琴書圖畫羅列後先尤嗜古器玩賞學琴後不復操曰但識琴中趣耳惟工詩不輟一時吟人咸相推許弟師周同居同財三十年無閒言暇日弟若子相賡酬自爲師友乙巳罹母喪哀慕幾欲無生其明年冬感疾丁未夏四月竟不起年五十有三秋七月壬辰晦窆于卦塘栖龍山之陽初娶監吉州糧料院李登孫女再娶戶部侍郎鄧詠孫女男希勉女適胡宜審孫寄生子移疾寓富州先葬期師周以前太學進士徐懋初狀因予妹壻周筠來請銘筠謂君佐敦厚篤實好賓客而不妄交希勉篤實如其父徐之狀亦云辭翰清粹端健爲詩冲澹蕭散不求工而自理致予雖不識君佐其槩可觀已嗚呼向之科舉誠不足得士然拘以定法乖逢一制於命非可以苟求得不得者安焉自

科舉法廢而仕進之途泛人人懷希覬速化之心離親戚棄墳墓跋涉攀援百計千人經歲年弊衣履犯風雨寒暑或至破家隕軀而不悔愚亦甚哉君佐之才豈不可翔鷲以其清致出而與今之君子游必有合也而安分知止澹然無營於世以終其身可不謂賢乎往年予被命徵爲國史官弗果赴今幸補外閑散無編纂之勤每欲述野史以自嬉凡山林恬退有足稱者具逸士傳若君佐其可銘曰

所豐者賢所嗇者年猗嗟乎天

袁君夫人史氏墓誌銘

元明善

夫人史氏四明人曾大父浩相宋孝宗太師保靈軍節度使魏國公致仕追封越王諡忠定曾祖妣貝氏齊魏國夫人從大父彌遠相靈宗理宗太師中書令大父彌堅端明殿學士屬兄中書令當國家居十七年以資政殿學士光祿大夫奉化郡開國公致仕贈太傅諡忠宣祖妣趙氏新安郡主封衛國夫人崇獻靖王伯圭之

女父諱賓之朝請大夫直敷文閣荆湖北路轉運副使贈通奉大
夫妣王氏宋相淮之女孫葉氏俱贈碩人處州姓袁氏同郡人曾
大父昇贈太師衛國公大父韶同知樞密院事資政殿大學士銀
青光祿大夫奉化郡公贈太師越國公父諱似道朝列大夫知嚴
州軍州事初敷文每言吾大父外大父皆真太師婚嫁必當吾門
敷文病嚴州日往候之敷文曰願以幼女屬公子某嚴州起謝吉
日納幣既七日敷文卒夫人時年六歲未幾嚴州亦卒越十有一
年歲辛酉夫人嬪于袁夫人諱棣卿字景華幼簡靜有威儀父卒
時坐牀下哭不輟聲彊之食不食未葬不少離殯次服除嘗一至
庶母室至嫁復一至別之外庭人不識其面伯父賓州家法嚴正
有事于廟夫人禮相祀事低首偃立至徹不少動既歸處州敬焉
處州少好騎射夫人正色諫止交游有至廳事者夫人牖屏間窺
或非清謹士即掩衾就睡明日徐曰先丞相家恐無此客處州亦
爲之謝絕中表俱貴家務相扇以侈夫人獨崇節儉動尊禮則歲

丙寅某月某日以疾卒于臨安官舍壽二十有一是歲冬十一月
葬于鄞縣通遠鄉建輿之原以宋宗祀明堂恩追封安人後三十
有三年處州卒別葬于桃源鄉慈溪輿之原相望十里外處州諱
洪字某清粹雅博爲士林之表仕宋至朝奉郎通判建康府事歸
聖朝同知邵武溫州處州三路總管府事階朝列大夫俱不任夫
人一男三女男楠翰林待制文林郎兼國史院編修官女長適宋
相史莊肅公嵩之孫似伯前將仕郎次適宋工部尚書余天任
之孫昌期前通仕郎次適宋資政殿大學士史巖之之孫益伯前
承務郎孫男三璋早世瓘琬女四長適同知餘姚州事趙孟賁餘
許嫁未行初夫人卒少母張氏來撫袁氏兒及見袁氏兒女嫁娶
終于袁氏處州葬之于夫人塋外翰林博學能文辭而學甚正辭
甚古故家流風清修可尙明善友焉一日手書其世家以請曰楠
生七日先夫人沒先夫人沒由楠之生生而不識母之音容何痛
似之願得君文表墓使先夫人之世之德不泯永遠或可以蓋楠

不天之罪再拜明善答拜起讀其所書曰夫人出大門歸大門處
州爲夫翰林爲子可謂無憾雖不永年得於天者止乎是又何歸
答其銘曰

相彼里仁有樂維鄞誰其高閎奕世相臣相臣女孫來嫁于袁猗
有袁氏輔來天子左闕右闕聯芳對峙維處州君士林孤秀靜女
其來君子是邁被服閒閒其儀肅肅廟祀斯嚴膺茲百福治爾宮
事莫不柔嘉內則無違載宗有家嗟哉物理若忌成嫩何靳大年
廿一而止昔祿中兒世業在傳克開厥後有壽而先壽匹自人天
奚咎天生也無憾沒不隱賢身壽不百名壽踰千我銘勒堅畢世
昭宣

翰林承旨王公墓誌銘

袁 楠

翰林學士承旨贈大司徒魯國王文肅公至大三年年六十有六
薨京師假葬于城東隅至治元年其孤翰林待制士熙始克奉柩
以十一月庚寅葬東平祖塋乘邱山之原士熙拜且泣曰知吾先

君莫若子幸誌其歷官行事納諸幽堂楠不敢辭爲之辭曰公諱
構字肯堂弱冠以詞賦入鄉校賈文正公一見器偉之俾教授其
子遂來京師至元十三年授翰林國史院編修官敘遷應奉修撰
陞侍講進翰林學士訖承旨佐丞相府爲司直歷吏禮二部郎中
太常爲少卿於臺外江北淮東道提刑按察副內治書侍御史入
省參議中書省事繼復出濟南公之在翰林也辭命詔令多出撰
述其最傳於世者世祖皇帝謚冊追謚太祖冊武宗皇后冊於實
錄預修世祖成宗兩皇帝定武宗上尊號親享太廟儀在太常考
輯因革有敘其佐丞相府剗刮蠹弊更始選士丞相齊魯國公信
從之爲治書時值桑葛擅中書政柄嫉方直士檄公偕翰林承旨
魯國文貞卜忽木公覈究燕南錢穀約月治辦公先事計畫不以
累魯公會桑葛誅乃得免害治吏禮二部無缺緩同列見公署字
不復視成牘以行參議六年一時執政聽南士陳利便搜括田賦
時平章政事何公榮祖與公正色不少讓摧萌折貪卒得其謀以

緩始天兵平宋詔徵賢能李學士同受旨公至杭首言宋三館圖籍太常天章禮器輿仗儀物當悉輦歸于朝董趙公文炳從其言今宋實錄正史藏史院繇公以完守濟南寬貧民官逋修閔子祠復學田觴詠自娛而訟益簡承旨李公謙公幼師事之遷應奉卒推以先勤敏通博洽時鉅公皆屈己期獎後卒與相並史館辟署亡慮數十人今踵躡清要皆門下士其爲文閉閣詠諷落筆纏屬不止於王言爲尤長臺閣故事資公始能奉行公之系繇琅邪居東平始八世祖沔爲宋司農卿守鄆因家焉曾祖瑀登金進士第奉訓大夫滄州無棣令妣范氏補鐸以公官承旨贈正奉大夫太常太卿妣杜氏臨沂郡夫人父公淵贈昭文館大學士資德大夫妣薛氏琅邪郡夫人昭文當亡金時有兄三人攜妻孥南徙昭文私自念王氏大墓盡族以行孰與守下車伏草莽兄呼其名第不復得後騎迫大慟以去昭文迄全其墓厚德勃興於公見之矣娶薛氏魯國夫人是生士熙再娶許氏皆先卒姚氏高氏晚歲得二

子士點士然女一嫁薛晉士熙能文辭有聲推薦賢之功王氏殆

未艾也銘曰

德統習周世莫與儔士林之標獎士無方髦譽珪璋孰隕其遭文鳴盛世金石雜比厥聲四昭子也允文戰兢紹聞嗚呼公之名益高

元文類卷五十二

元文類卷五十三

墓誌

上都留守賀公墓誌銘

虞集

世祖皇帝建上都於灤水之陽控引西北東際遼海南面而臨制
 天下形勢尤重於大都大駕歲巡幸中外百官咸從而宗王藩戚
 之期會朝集冠蓋相望億萬之計壹統之留守故為職最要焉自
 非器鉅而慮周望孚而幹固明習國家典要深為上所信嚮者殆
 不足以勝其任也自世祖時以屬諸賀氏至於今三世矣方奉元
 忠貞王為政時一府之中非無國人貴姓與之共位又有材僚佐
 布在行列求其臨事決議之際必得其一言而後定則它人固不
 能矣是以終至元之世數十年間有贈秩賜金而終不可遷居宅
 官焉公忠貞之子也諱勝字貞卿以小字伯顏行幼從魏國許文
 正公學通經傳大義年十六以大臣子備宿衛世祖甚器重之入
 則侍帷幄出則參乘輿無晝夜寒暑未嘗暫去左右故事論奏兵

政機密非國族大臣無得與聞者時獨不避公或更命留聽近侍
或言論語八佾之五章若訕今日者盍去諸上以問公公曰夫子
爲當時言距今二千餘載豈相及哉且國家受天命爲天子有天
下固當下比古之遯遠小君而自居乎上然之廿四年乃顏叛率
其兵入遯上親將討之將戰之夕唯近臣只兒哈良帶劍立寢門
外雖親王貴人不得輒至而公入直帳中受密旨出入指授諸將
及戰公擐甲前導牙纛旣成列還侍上側王師奮擊遂克乃顏明
日上顧謂近侍曰昨者之戰飛矢及於朕前毅然無懼容者唯伯
顏爲然都人見上之親征也頗恟懼上欲慰安之故亟還夜行臥
輿中苦足寒公解衣以身溫上足乃安寢及旦蹕駐始寤宅日上
自校獵還宮伶人道迎有被色繒綴雜旄象師子以爲戲者載輿
象見之驚逸執輿者莫能制公時侍上在輿中卽自投下奮當其
觸突後至者始得追及斷鞞脫象乘輿乃安而公創已甚上親撫
之命尙醫尙食謹護視蓋三月而後安是時天下初定四方以

聞者上欲亟賜報公方少壯能日馳千里又上所親信有使事輒
見遣受命無留行復命無後期所區畫動合旨意或朝至而夕復
出亦不少憚也故六詔西域交廣之屬無不至焉槩計其所歷無
慮數十萬里上春秋已高海內已定每嚴畏天象以自警司天有
奏得非時以聞因拜公集賢學士服一品服以領之桑葛之爲相
也怒忠貞之尹京常不下已危中之上前旬月之間數十奏不止
賴上察公父子深故免廷臣共知其姦無敢爲上先言之者公當
啟其端而言者繼之始服罪上之改尙書省爲中書也方卜相顧
謂公曰汝以爲孰當吾心者公再拜曰命相國之大政非小臣所
敢知然求之輿望以爲太子詹事完澤線真子也端重忠實可屬
大事上曰然吾并得所以佐之者矣遂相完澤而以公爲參知中
書政事時年二十八耳參決朝議明允通練一時驚異焉久之又
拜僉書樞密院事又拜大都護典外國之來屬者成宗皇帝卽位
之十年忠貞告老尋歿于家而公拜榮祿大夫上都留守兼本路

都總管開平府尹虎賁親軍都指揮使服忠貞所佩虎符至大元年拜光祿大夫左丞相行都留守兼本路都總管府達魯花赤延祐二年拜開府儀同三司上柱國三進而彌尊遂兼台司之貴而留鑰之寄如一蓋世官矣上都地寒不敏於樹藝無土著之民自穀粟布帛以至織靡奇異之物皆自遠至官府需用萬端而吏得以取具無闕者則商賈之資也多並緣爲姦一旦稱遽發所居以集事而直不時得人用病焉公常閱文書按而予之無或失其業故來藏市者沛然日增稱京師之盛公坐府治事謹辰酉吏舍肅然具贖無敢玩出內無敢欺貴人大家或以上命得給賜若營繕市易多遣私人逼脅府史凌辱僚吏榜係其民人家橫過取無可誰何公必盡奏抑治之而善柔者亦必使得所當而去吏有持上供物入宮門迫暮不得出所司捕得奏誅之公曰此有故非闌入也力爭之吏得不死奉聖州民高氏隸籍虎賁衛以多貲名身死而子幼貴官有利其家財者使部曲強娶其婦公爲辨之前

不聽娶高氏乃得全其家公以民之饑也嘗便宜發廩不待得請以民之不知教也始大爲學舍禮儒師以風化之是以吏民不識貴彊之凌暴承其教戒仰之若神明焉相率爲祠於西門之外設公象而祝之關陝之亂公方朝正月於大都上曰上京根本之地其速還鎮卽日告行都人見公至如孤弱得慈母時安王將兵北行所過多侵掠公謂之曰君父倚王以保民禁暴今未出國門而行次失律天子或以爲問奈何王悟謝之整兵以行民用安堵時方隆寒士馬凍乏縣官芻糗衣著不時具公以私藏足之行者以爲感仁宗皇帝乃命工畫公象勅學士爲贊識以天子之璽而賜之俾傳示子孫於是公有足疾辭不任劇願賜骸骨歸上曰祖宗以上京屬卿父子民安化行朝無顧慮久矣徒臥護可也乃賜小車俾乘以出入得至禁廷焉當是時太師鐵木迭兒爲丞相子弟縱虐於民公壹繩之以法官時宿儲而丞相家奴擅罔市利責高直於官公每裁抑之又惡其帷薄之不修也而貪嫉日盛絕不與

往來都人張弼子般人獄具丞相受其金錢無算為折辱留守脅使易辭出之公持不可而中書平章政事蕭拜住御史中丞楊朶兒只等顯奏之天子震怒罪且不測賴太后仁恕以為言幸得罷去相位而諸公之怨不可解矣英宗皇帝之即位也鐵木迭兒復為丞相乘閒肆毒睚眦之私無不報者蕭楊二公既已被害即誣公乘賜車出迎詔書為非禮而執之激怒主上遂見殺公死之日京師之人巷哭相聞而士大夫憤怒相視以目自是廷中不附己者固已盡中傷之而恩深不報者亦見及而無遺矣久之天子察其故斥不得居位遂死於家敕仆所樹頌功碑而言者始昌言蕭楊及公之冤未及有所昭雪而上崩今上皇帝入繼大統發明詔以慰撫天下顧未暇他及而首以公等之枉為言蓋知天人積憤之故本由巨姦殘忍以啟之也於是姦忠逆順之辨大明死者固已少自釋於地下而天下之公議亦少振焉明年乃贈公推忠宣力保德功臣太傅開府儀同三司上柱國追封秦國公諡惠愍贊

書哀惻聞者感動命下日都人走詣其殯不約而至者幾萬人而其子惟一即拜正議大夫同知上都留守司事泰定四年秋集執經講帷從在上都而惟一適遷陝西廉訪副使乃來告曰家世荷國厚恩受京邑之託父子一心所以圖報稱於萬一者天實臨之列聖實鑒之我先人遭罹姦凶遺履危禍此惟一泣血終身而不忍言者也皇上聖明灼見隱伏不遺故舊褒卹之典極於哀榮又不以惟一不肖俾嗣世職感恩戴誼是以未敢申其情事期滿歲而請行今易節以西實過鄉里是天所以賜惟一也將以某年月日奉以歸葬焉惟先人終始定於國是非一家之私言也託諸幽宮以期不朽者非太史氏其何徵乎敢以為請此又惟一忍死以待者也集受其言而悲之乃考諸見聞與其客呂弼所為狀得祖宗付囑賀氏以上都之事與賀氏父子之為治者乃并朝廷哀忠臣懲往失之意而具書之按賀氏家隰州之永和今為京兆鄠縣人曾祖種德封通奉大夫護軍雍郡公妣郝氏贈雍國夫人祖賁

京兆路總管諸軍奧魯贈輸忠立義功臣銀青榮祿大夫大司徒
封雍國公諡貞憲妣鄭氏贈雍國夫人考仁傑光祿大夫上都留
守虎賁親軍都指揮使平章政事商議陝西等處行中書省事贈
推誠宣力翊運功臣太師開府儀同三司上柱國追封奉元王諡
忠貞妣劉氏鄭氏皆封雍國夫人改奉元王夫人娶張氏早卒又
娶捏古真氏亦先公卒皆封雍國夫人改封秦國夫人子男二惟
一惟賢為尚衣奉御女二長適平章政事阿不海牙次適搠立忽
攀公墓在鄠縣某里從先塋也銘曰
巍巍神京世祖所營殿于漠南治朝廣廷有城有關民之攸止大
纛周廬亦有舍次始命董茲國有幹楨舉綱挈維紀目亦程維昔
周郊陳寶繼且慎始和中異體同貫我則不然世官尚賢保綏成
功動循故先公始待中年壯氣銳出入踐敷百試無替乃贊國鈞
乃佐本兵乃斂長籌以督畿坻時巡至止百用具給清宮言還留
鑰是執歲率其常年與位遷膺力則非精思弗愆時入禁闥

咸拜名王細侯亦仰而慨曰此老成世皇之臣祖事孫承矧其都
人公出視政獄市無擾商曰予獲民曰予保公田于野徒御不囂
有警無邀具咨公勞公惟小心不懈爾謹義之有激事在無隱竊
位為權彼凶滔天我則老臣忍從危顛二三君子掎角以制不竟
于斷階此大厲嗚呼昊天不淑謂何假威神明徧為百訛國論素
定公則不隕揚言孔昭天子之聖保終沒靈豈必謂身身枉義伸
抑又何呻我哀公子知忠念孝還葬忍緩思報之道奉節過家天
子命之承志正邱天道聽之嗟彼都人不歌以相曰此有祠公庶
來享南山峩峩其鹿維林公從先王歸復自今貞珉刻辭作于太
史千載之徵也愧孫子

平章政事張公墓誌銘

虞集

我國家有文武忠孝世勳大臣曰蔡國公張公以泰定四年十二
月甲寅薨于保定滿城縣岡頭里第遺命上蔡國公印丞相即日
以聞上為震悼勅有司贈官致賻如禮公卿大夫相弔于朝中外

聞者莫不嗟嘆異口一辭曰烏乎正人凶矣其孤景武等以明年
之二月辛酉葬公于定興縣之河內從獻武王之兆次也先事三
日使其孫旭屬太史虞集書墓銘事嚴不敢辭謹按公諱珪字公
瑞故累贈太師開府儀同三司上柱國蔡國武穆公諱福寬之曾
孫故累贈推忠宣力開國翊運功臣太師開府儀同三司上柱國
汝南忠武王諱柔之孫故累贈推忠效節翊運保大功臣太師開
府儀同三司上柱國淮陽獻武王諱弘範之子也至元十六年獻
武王平宋海上歸奏成功道出江淮公年十六行省臣察其英偉
留公攝管軍萬戶明年真拜昭勇大將軍管軍萬戶佩其父虎符
治所統軍鎮建康未幾獻武薨京師世祖皇帝亟召公還治喪既
葬有勅入朝上親撫之因得面奏曰臣幼軍事重聶禎者從臣父
祖久歷行陣幸以副臣上嘆曰知求老成自副常兒不知出此厚
賜而遣之徧及其從者元領軍半成湖廣省命還其麾下十九年
冬以使事入見上賞識其成立初凡內宴忠武以功賜坐諸侯上

至是時勅公坐其故處還軍盜起蕪湖宣徽尤甚皆僭號署官掠
郡縣燒府舍殺縣長吏江東新附民心易搖應者日眾至犯杭之
昌化行省官以重兵討之未克報至之日公投衣而起率步卒向
蕪湖蕪湖定乃使人言于行省宣徽雖非我所部盜起我不得以
彼此為解以其兵行行省因以討賊屬公與他將會惟公部曲所
過無擾宣部士數為賊劔將奔潰公傳令止之乃定敗卒有殺民
家豕而并傷其主者公曰此軍之所以敗也斬之明日戰三合三
勝而賊益眾困我公曰日莫矣斂兵設伏賊不敢動明日復戰公
曰宣卒敗而怯毋累我眾使持旗鼓為聲勢自以所部為二隊命
之曰賊勇者在前前行擊之後立者脅從烏合耳遣親將帥二十
五騎衝其後陳亂前行奮擊追奔數十里得賊酋斬之其馘三百
而自相蹂踐以死殆盡乃遣人撫安餘民又有賊吳道者以妖術
起兵亦有名號恃其妖來往軍門且易公年少欲因入謁刺刃以
駭服其眾公得其情即執斬之麾下其黨大誓而它酋猶將襲公

公夜伏兵山上令之曰賊至而起明日擊賊賊走山伏起蹴賊墮崖死磔其酋宣州平賊之寇徽者又敗兩萬戶軍公曰賊輕我矣往必得之獲生口三十縱之使歸散語其人曰張萬戶知汝柵居保族逃死耳官軍不諒汝以賊擊汝與官軍格非汝志也來降吾能活之不然吾擊汝立盡明日稍稍以牛酒來見皆印識其衣令兵識之勿敢犯漸以信服有持金帛來者弗受兵不動而安者十八九矣獨南嶺西坑之寨尤險固又嘗劔官軍懼益自保不聽命公得野人計導勝兵百餘人鳥道緣登其巢背度已至奮兵擊之賊出戰巢背軍下據其壁賊回顧已失其穴不得還其孥由它道走或請邀之公不可賊以孥得出益懈公曰可矣縱兵擊之血流成川執其酋送之行省誅之南陵盜又起稱天王攻宣州州兵不能支公得檄帥輕騎數十赴賊並林陣公不介而馳之賊靡賊見無後拒引眾圍公公揮稍出入殺數十人及賊平郡人德公至于今祠之蓋自是江東之人安於耕田鑿井以其賦稅而長子老孫

矣軍中遂以無事得宋禮部侍郎鄧公光薦而師事之鄧公以相業授公曰熟之後必賴此用矣凡在軍十四年而復入朝實二十九年也是時行樞密院江南或曰天下事定矣可無煩行院也而張瑄者以浙省參知政事任海道運餉亦以為言樞密副使暗伯問公公曰見上當自言之遂召對蓋張方以軍餉得幸公恐其擅利海島因勢用眾將非其福故告上曰縱使行院可罷亦非瑄所宜言浙省控制甚重而行院得制其軍事非始計乎上曰其命為副使太師月呂魯那演言張珪年尚少姑試以僉書果可大用請俟它日上曰不然是家為國家踏金蹙宋盡死力者三世矣漢人賜號拔都者惟真定史天澤與其家耳史徒持文墨論議孰與其家功多而可靳此耶拜鎮國上將軍江淮等處行樞密院副使久勞之師新附之地賴以安焉成宗皇帝卽位罷大德三年遣使循行天下詔公持節川陝民之疾苦便宜振之如罷官府之冗無益於民者贖探馬之貧而典鬻妻子者還鞏昌民之復僉為軍者皆

其事也比還拜江南諸道行御史臺侍御史換中奉大夫浙西宋之故都民物繁庶貢稅雜藝倍蓰他鎮貪吏豪右甘心其閒朝廷病之以公爲肅政廉訪使下車未數月所部郡長史以下罷劾三十餘府吏胥徒無慮數百其贓鉅萬萬強民有殺人恃其貲得不寘獄更陰制官吏持鄉里短長訟否受成於其家公按之如法民間始知有條制焉得鹽運司姦吏事服連上下具有實跡將發之而竊位方面者內不自安欲因以危中公使其屬以女子金錢賂遺近臣用妄人言公有厭勝事且沮鹽法天子爲遣官數人往雜治之得行省大小吏及鹽官欺罔狀皆罪罷而公召拜僉樞密院事入見同列言此張九拔都之子也故事侍宴別爲冠衣制飾如一國語謂之只孫公受賜因得數宴見探馬赤軍之戍北者多逃歸吏請按法誅之公曰逃者聞命懼誅將聚而爲盜其以百日許自歸有不至者乃誅之可也奏可公雖世家無第宅在京城或言公儼居於上者命買宅以賜辭不受拜御史中丞行臺江南因上

疏極言天人之際災異之故其目則有修德行廣言路進君子退小人信賞必罰減冗官節浮費以憲法祖宗者是時中書大臣有以朱清張瑄之行賄也事敗貶湖廣關節近倖求復相位而江浙省誣公者亦在中書公劾之不報馳駟面疏論之并及近侍之熒惑者又不報遂謝病歸久之又拜中丞行臺陝西不赴武宗皇帝時仁宗皇帝在東宮召拜論德未數日拜太子賓客復遷詹事辭不就尙書省臣濫殺無辜輕革錢幣中外洵洵中執法久關人上方圖任仁宗曰必欲得眞中丞惟張瑄可苟不稱我任其責上即日召拜中丞居月餘上不豫三寶奴矯詔赦天下常赦之所必不赦者未幾上崩仁宗命按誅之而其黨有求脫免者公力言諸上雖得不死猶杖之仁宗將卽位廷臣用皇太后旨行大禮於隆福宮法駕已陳矣公獨奏其不可臺長止之曰議已定雖百奏無益公曰未始一奏詎知無益哉且大位太祖世祖之位隆福太后之宮也舍大明弗御天子果卽何位乎上悟移仗大明遂卽位賜只

孫衣二十襲上金五十兩使自爲帶受衣而辭金不允制帶以賜之上命道士劉志清以其法爲醮事近侍分其所用金幣道士訟之臺而近侍譖道士於上前當殺者六人公力辨道士無死罪上怒曰汝以臺綱脅我耶公曰御史臺陛下之臺則臺綱陛下之綱也陛下奈何欲自壞其綱乎上怒未解顧左右扶出明日復叩頭苦諫曰陛下必欲用譖言殺無罪臣請先死上卽不殺六道士親解衣以賜公明日上謂近臣曰人言中丞忠臣乎張中丞乃張忠臣非官中丞也召謂之曰朕欲厚賜卿非無寶玉如非卿心何因以御巾拭面額納諸公懷曰朕澤之所存朕心之所存也其服膺毋失皇慶元年八月拜榮祿大夫樞密副使舊制中州軍士鎮江南者踰嶺以戍率二年而代遭犯瘴癘十無一還公曰是徒寘之死地耳奏請屯置近邊其嶺表要害因其土人以戍不幸前死者官給樁傳還其家從之徽政院使失烈門請以洪城軍隸興聖宮而已領之以上旨移書省府眾恐懼承命公曰徽政有左右都衛

兩軍足備工役又欲此將何爲固不署事得寢而怨怒自此思害公矣延祐二年拜中書平章政事請減煩冗還有司以清中書之務專修宰相之職焉上從之著爲令教坊使曹咬住拜禮部尙書公曰伶人爲大宗伯何以示後世上曰姑聽其至部而去之公又諫乃止皇太后以中書右丞相鐵木迭兒爲太師萬戶別薛參知行省政事公曰太師輔上道德鐵木迭兒非其人萬戶無功不得爲外執政上深許公言而東朝之怒滋矣失烈門等謀所以去公中書者開車駕時巡旣度居庸皇太后宮幄在龍虎臺遣使召公宮門下以中旨切責之賜杖公創甚輿歸京城明日遂出國門賢人士大夫祖餞感歎以爲公之身可辱公之名不可辱斯事也所謂質諸天地鬼神而無愧者歟公子景元蒙上眷遇掌符璽不得一日去宿衛至是以父病革告遽歸上驚曰卿別時卿父無病景元頓首泣血不敢言上不懌遣參議中書省事換住往賜之酒遂拜爲大司徒謝病家居尋丁母夫人憂廬墓三年寢苦啜粥病腫

濕或勸之食肉不聽日於其間累土墳次如臺者三延祐七年正月
 上憶公生日輟上尊解御衣以賜之蓋仁廟於公終始之意固
 將有為而竟奪其志悲夫至治二年英宗皇帝召見公於易水之
 上曰四世舊臣朕將畀卿以政公辭歸遣近臣設醴候諸館東平
 王拜住時為相問公曰宰相之體何先曰莫先於格君心莫急於
 廣言路是冬起為集賢大學士先是鐵木迭兒復為丞相以私讎
 殺平章蕭拜住中丞楊朵而只上都留守賀伯顏皆籍沒其家大
 小之臣不知死所會地震風烈朝廷臣集議弭災之道公以大學
 士當議抗言於坐曰弭災當究其所以得災者漢殺孝婦三年不
 雨蕭楊等冤死非致沴之一端乎死者固不可復生而情意猶可
 昭白毋使朝廷終失之也又拜中書平章政事初公將兵時所佩
 符及歷臺省每除必讓還曰此軍符也非他官所得佩請上之典
 瑞自大德來凡三上三不允至是以聞又不允而公固請竟納之
 侍宴萬壽山又特有玉帶之賜三年秋御史大夫鐵失等自上都

來夜扣國北門逕入中書稱遽矯制奪執符印莫知其端久之稍
 有知上暴崩于南坡者公遂顧無足與共事而魏王徹徹禿以親
 王監省公密撼之王有感動意因曰我世為國忠臣不敢愛死事
 已若此大統當在晉邸我有密書陳誅逆定亂之宜非王莫敢致
 王曰公誠忠萬一事泄得無危乎公曰事成王之功事敗吾家甘
 糞粉萬死不敢以言累王於是王遣人達其書今上皇帝即位于
 龍居河躬行天誅罪人以次就戮及大駕至統幕公迎謁上顧問
 曰此張平章耶密書之來良合朕意公拜曰陛下入承宗社大義
 昭明皆睿斷也區區之忠何及於事上曰以日計之卿言不緩自
 探佩囊出片紙付翰林承旨關徹伯曰此當書之史眠其紙則公
 密書也方尚食既嘗悉輟以賜公峻南者鐵木迭兒之子官治書
 侍御史南坡之夕穀弓矢露刃以佐鐵失而獨後誅有司奏當流
 之報許公入見曰法強盜不分首從死峻南之逆豈止強盜之從
 乎發冢傷屍者亦死峻南親斫丞相拜住臂豈止傷屍乎逆賊無

君父是無天日也豈有無天日之地而苟容其生乎遂伏誅仁廟
範金爲主盜竊之時參知政事馬刺兼領太常禮儀使當遷左丞
公曰以參知政事遷左丞姑曰序進而太常奉宗祏不謹當待罪
而遷官何以謝在天之靈遂格其命時有勇暴者則名元從中怙
恃恩私肆爲不法有醫婦飾而過市六七人要而執之加無禮焉
有尉捕得強盜械送府盜有親者方乘傳出使擊尉去破械縱賊
有司莫得而詰告諸省府又不得請公曰如是則亂生矣力命捕
之皆得諸權要之家會赦得解有售珠於內府枚論之一小者有
直萬緡公曰萬緡中人幾家之產會其珠凡幾萬乎且戰國小君
猶以得賢勝照乘會彼識之不若乎又手疏極論法度寬弛紀綱
日壞汙穢賊虐恬不爲怪逆順不明於人心禍亂之鑿不遠惟聖
明奮其乾剛以振德之則仁厚之澤無偏黨矣不報而公病增劇
非扶掖不能行有詔常見免拜跪賜上車得乘至殿門下上肇開
經筵講帝王之道明古今治忽之故命左丞相與公領之公進翰

林學士吳澂等以備顧問每進讀公懇懇爲上敷說皆義理之正
無幾微權謀術數之涉焉自是辭位甚力上委曲勉留而後許然
猶封蔡國公知經筵事別刻蔡國公印以賜庶幾其少留也泰定
二年五月公得旨暫歸天下之功成名遂而身退者未有能及之
者也三年春上遣使召公期以必見公力疾而謁上曰卿來時民
間何如公曰臣老寡賓客不足遠知真定保定河間臣鄉里也民
飢甚朝廷幸出金粟賑之而惠未及者十五六惟陛下念之上惻
然勅有司畢贍之如公意又一再進講拜翰林學士承旨知制誥
兼修國史國公經筵如故上見其誠病謂之曰西山佛祠多高潔
可以頤神已疾卿擇而處之駕至上都上顧謂丞相若曰張平章
安否老人恐乏侍養宜以時還家得無便乎因遣使撫諭之務在
順適其意於是公始成歸矣少閒長衣幅巾逍遙泉石之間與山
僧野老分席以相愉悅上稍聞之以公爲愈矣起公商議中書事
公曰老臣荷國厚恩四世而臣事六朝矣一息未盡其忍忘朝廷

乎如筋力弗勝何使者不敢強閱數月又病上遣太醫視之久不
愈乃移書中書曰病不任事而國公月俸千緡弗敢受籍會之凡
爲定者三百餘悉還送官上閱傷其意留其俸度諸府俄而公薨
公資本高明又輔以學力積世勳崇期世其家以經濟自任臨事
決議侃侃正色勇於敢言千挫萬折人所不堪公志不爲小變而
氣益昌雖貴倖臨之衺黠侮之公一以誠慤自處久之而各失其
所持者多矣究而論之蓋古所謂社稷之臣者乎公少能挽強命
中嘗從大師出林薄有虎在焉人馬辟易公抽一矢直當虎虎人
立矢洞其喉一軍謹囂及學書腕力尤健端重嚴勁無慚筆諫之
臣讀書不尙章句務求內聖外王之道既而稍進方外之士以悅
生佚老焉公初娶楊氏繼室烏氏又娶鄭氏並封趙國夫人皆無
子清河郡夫人孫氏生定遠大將軍保定等路管軍上萬戶佩虎
符鎮武昌曰景武者公長子也次景魯亞中大夫海北廣東道肅
政廉訪使景哲奉政大夫僉浙東海右道肅政廉訪司事景元資

政大夫河南行中書省參知政事景德未仕卒景誠文林郎內政
司丞女五人長適朝列大夫太常禮儀院判官董守慤次適中順
大夫祕書監丞趙伯忽次繼室董守慤次未行次適武德將軍保
定翼管軍上千戶忽都帖木兒孫男十一人長曰旭宿衛次曰昌
明威將軍保定等路管軍上萬戶佩金虎符曰昆曰昇曰昭曰晟
曰曜曰旺餘皆幼孫女六人銘曰
維蔡建國自其先公於焉訖金是用啟封公子公孫洵揚世武追
王奕奕曰淮曰汝顧瞻先履額額有城孰不胙土我于其生於皇
建官略用漢制將軍司馬丞相御史三府相望總贊國成人登其
一已極顯榮我以世將典司風紀既貳宥密又使宅揆公曰噫嘻
我曷致茲于公先王究忠百爲人曰拂哉德則惟世智周盧淵乃
克有濟世皇作之成宗渥之穆穆武仁心焉度之大車旣載千行
而柅孰謂得君眾忤構厄旣逐旣藏侃侃大剛先帝遺直以錫嗣
皇有猷有爲有言有烈相時儉壬睢盱震懼大駕之來法宮旣清

出納咨諏屬于老成人亦莫閒政亦莫適抱其遺經積誠思格白
髮蒼顏安車以朝佇瞻威儀德音孔昭公雖言歸公鄉近止公疾
遘已公來觀止公今不來天子永懷一鑑之亾四國之哀勳在王
室德施孫子著銘立堂作者太史

元文類卷五十三終

元文類卷五十四

墓誌

嶺北行省郎中蘇公墓誌銘

虞集

延祐七年二月壬戌中憲大夫嶺北等處行中書省左右司郎中
蘇公志道字寧父卒于京師七日戊辰子天爵以其喪歸真定三
月乙酉葬諸縣北新市鄉新城原先塋之次而刻石以文曰嶺北
行省治和林國家創業實始居之於今京師爲萬里北邊親王帥
重兵以鎮中書省丞相出爲其省丞相吏有優秩兵有厚餉重利
誘商賈致穀帛用物輕法以懷其人數十年來婚嫁畊植比於土
著羊牛馬駝之畜射獵貿易之利自金山稱海沿邊諸塞蒙被涵
照咸安樂富庶忘戰鬪轉徙之苦久矣丙辰之冬關中猝有變未
兩月遂及和林守者不知計所從出人大震恐竝塞奔散會天大
雪深丈餘車廬人畜壓沒存者無以自活走和林乞食或相食或
枕籍以死日未昃道無行人方是時除吏率恇怯傾辭不慮往獨

蘇公受命卽行曰豈臣子避事卽安時耶既至曰事孰急於賑飢者明日告其長曰幙府謹治文書數實錢穀知前遇事變無甚費失上下因爲姦利取且盡徒有粟五萬耳民間粟石直中統鈔八百貫安從得食請急賑之大人人三斗幼小六之一卽亟請于朝曰倉儲無幾民與軍皆君之赤子賑民飢將乏軍興謹儲之則坐視飢者之死不得已飢者急在旦暮已擅發願急募富商大家先致開平沙靜附近之粟別設重購實邊勿惜一日之費爲經久慮幸甚中書省以聞天子爲遣使護視賑飢且下令曰有能致粟和林以三月至石與直五百千四月至石與四百五十千五月至又減五十千至皆卽給直賈運踵至不三年充實如故乃爲成法使勾稽考覈參伍鉗制以相承吏守之不改易於是沿邊諸王多汎索公持法一不予王怒使人謂公錢豈爾家物公對曰有司知給軍事非軍事誠不敢擅與且擗節謹惜非爲己私王幸察亦無以爲罪皇子安王是之褒以衣一襲吳王亦知公徒行予名馬公受

而傾橐償其賈和林禁酒法輕不能止中書更奏重法罪至死令下三日索得民家酒一缶趙仲良等五人當坐省府論後奏公持不可曰酒非三日成者犯在格前發在格後當用後法設當坐猶當用詔書審覆詳讞乃奏決無敢擅殺眾不可公獨上其事中書省刑部議如公言其人皆得不死人知公明決有爭者悉詣公公曰我不得治有司事叱遣不去卒得一言則皆服而退和林旣治事日簡乃卽孔子廟延寓士之知經者講說率僚吏往聽至夜乃休孔子廟故丞相順德忠獻王所築未成而王薨至公始卒其工朝廷知公功使者往來必撫問慰勉監察御史按事至邊民數百人狀公行事卓卓者數十上之御史以聞而公與同列多異議代歸百姓不忍其去行至京師卒公初以吏事爲眞定守山西姚公天福所推擇旣知名轉補山西河東道按察司書吏用使者程公思廉薦爲監察御史書吏轉戶部令史歷樞密院中書省掾出官承直郎中書檢校官刑部主事樞密院斷事府經歷嶺北省郎中

終始不離吏事然皆有可稱者在真定從其尹決獄竟大旱俄雨
在河東所按問無自言寃者在察院從御史按事遠方能正色感
愧所事令無敢失職在戶部從禮部侍郎高公昉治白雲宗獄浙
西白雲宗強梁富人相率出厚賞要權貴稍依傍釋教立官府部
署其人煽誘劫持合其徒數萬凌轢州縣為姦利不法者能為明
其誑誤者出之田廬資賄當沒入者鉅萬沒入之良家子女數百
當還民間者還之閱二歲五往返京師以具獄上在樞密院軍吏
子孫當襲官其貧乏之至十餘年不得調悉舉行之天子使大臣行
邊北方獨以公從有弓矢衣鞍之賜在中書值尚書省立威勢赫
然中書掾多從尚書省辟公獨不赴泊然守局如常尚書省罷分
鞫其銓選不法者黜奪必以理為檢校官得工戶二曹濫出財物
數千收之得吏曹官資高下失當者數十事正之在刑部能不用
上官意出故犯者能卻時宰欲殺盜內府金而獄未具者能驅主
盜吏之使盜引良民者能刪治其條例以便引用者在樞密斷事

府能辯庶弟之誣其兄而奪其官者總計之蓋未嘗一日苟廢其
職者也然和林之政偉矣我國家初以干戈平定海內所向武力
有功之臣然錢穀轉輸期會工作計最刑賞伐閱道里名物非刀
筆簡牘無以記載施行而吏始見用固未遑以他道進士公卿將
相畢出此二者而已事定軍將有定秩而為政者吏始專之於是
天下明敏有才智操略志在用世之士不繇是無以入官非欲以
是名家趨急用也而世或專以善持長短深巧出入文法用術數
便利為訾病者殆未盡也不然若蘇公者其可以從吏起家少之
哉公幼不好弄寡言笑不妄交為吏視文書可否奉行不待請言
者坐曹歸闔門不通問謁對妻子如嚴師友內外肅然好讀書尤
尊信大學及陸宣公奏議未嘗去左右篤於教子餘奉輒買書遺
之子亦善學卒以儒成名如公志公之先趙之樂城人再徙真定
會祖元老祖誠考榮祖以公貴贈奉直大夫同知中山府事飛騎
尉真定縣男妣吳氏贈真定縣君娶劉氏封真定縣君黑軍萬戶

義之孫征行百戶誠之女子男五人四人天其一天爵也以國子
高第授從仕郎大都路薊州判官治公喪以禮女三人適勸農司
使宮天禎次適真定醫學錄張蒙次適承務郎河南行省都事何
安道封恭人孫男昌文於是公之年才六十耳雖久服官政皆佐
人無所自遂方鄉用遽沒君子惜之銘曰
有肅蘇公執德不回淵嘿自持弗耀其材始時羣公好善已出孰
學孰耕匪求乃得得不以求氣直而昌譽譽舒舒何行弗臧直道
若据不利涉世我篤自信守以終始五掾大府位卑志行四命于
朝彌光以亨頌頌和城興王攸理控制朔易何千萬里國人居之
谷馬雲生尙莫往來矧周其情御史有簡從執以書孰害其人據
義挾除天子德音元戎往布曰爾從我弓馬錫予再歷其方有法
有恩其人識知掾語孔文狃安易撓我際其會以哺以繒幕府維
最邊人方懷公不少留見用駸駸而疾不瘳炎炎弗趨寂寂弗變
當爲而爲當辯斯辯退而能思閉戶深居制行甚嚴動本於儒儒

行吏師庶其在此有書滿堂以遺其子子能習之亦允蹈之豈惟
官成勗公之私匪源無深匪流無長以承以傳在此幽宮

熊先生墓誌銘

虞集

先生諱朋來字與可姓熊氏世爲豫章望族祖文炳父希曾以宋
淳祐丙午年生先生先生以咸淳甲戌登進士第第四人授從事
郎寶慶府僉書判官廳公事未上而宋亾世祖皇帝初得江南常
以名取士盡欲得故國之賢能而用之尤重進士若故相留公夢
炎固已爲內相尙書而王君龍澤亦召拜行臺監察御史先生名
不在王御史下然不肯表襮苟進隱處州里生徒受學者常百數
十人因取朱子小學書提要領以示之學者家傳其書幾徧天下
時來鎮豫章者多名公卿皆以客禮見先生先生和而不肆介而
不狷儒者倚以爲重焉憲使魏公初與先生從容東湖之上先生
指其北涯曰徐孺子故居在焉太守陳蕃之所表也而里門西南
出曰桂華無所當矣魏公感其意更表爲高士坊郡城外舊有宗

濂書院祠周子兵興燬之先生得郡人黃氏故居於孺子宅東北
加葺焉徙其名表之公私爭致助儼然立爲學官矣劉公宣之持
憲節也尤敬先生論經義無虛日閒以政事爲問先生愀然曰郡
學上丁釋奠諸生有與執事者公固見之而是日有盜劫傷人者
南昌賊曹執而掠之幸儒者善柔不能自白誣之獄成矣耳目所
及尙有此又何問乎劉公曰有是哉卽日審得實立破械出此儒
者以其械械賊曹諸公由是益知先生之有用於世者而終不敢
以事溷先生也會朝廷使治書侍御史王公構銓外選於江西於
是行省參政徐公珍李公世安郎中馬公昫憲使盧公克柔列薦
先生爲閩海提學使者報聞而福州廬陵爲郡在東南儒學之士
爲最多朝廷大興文治加意此兩郡特起先生連爲之教授先生
所至考古篆籀文字調律呂協歌詩以興雅樂制器定辭必則古
式學者化焉故其爲教不止於詞章記問云者旣歸有司以常
格調建安簿不赴後又以福清州判官致仕先生一視之漠如也

更自號曰彭蠡釣徒而四方學者稱之曰天慵先生云先生燕居
弦雅瑟而閒歌以爲樂門人歸之者日盛旁近舍皆滿至不能容
先生懇懇爲說經旨文義老益不倦得其所指授多爲聞人達官
舉進士者項背相望延祐甲寅天子獨斷以進士科取士進士科
廢已久官府咸不知其說以不稱明詔爲懼獨江西行省諮問於
先生動中軌度因以申請四方得遵用之請先生爲考官則曰應
試者十九吾門不可而後舉江南三行省皆卑辭重禮致先生
主文先生以儒事爲重皆應之及對大廷先生所選士居天下三
之一焉初先生以周禮首薦鄉郡而今制周官不與設科治戴記
者又絕不見先生屢以爲言後得周尙之以禮經擢第習此經者
漸廣由先生啟之也英宗皇帝始采用古禮親御衮冕祀太廟奮
然制禮作樂之事朝之大儒搢紳先生凜然恐不足以當上意而
翰林學士元公明善颺言於朝以先生爲薦未及召而至治三年
五月先生卒矣享年七十有八先生動止有常喜怒不形於色接

賓客人人各得其意去有家集三十卷其大者明乎禮樂之事關於世教餘若天文地理方伎名物度數靡不精究焉先生娶袁氏子男曰永先象先太古孫男曰昶昇昶生寅生富以是年十二月望日葬先生於豫章城南石馬之阡太古與其門人今陝西行省左丞廉惇前進士余貞曾翰等使以書來京師求銘集受而對曰昔先生與我先君太史同年生友誼甚重集再以待制召復入史館道過豫章前先生之卒數月耳先生以其所撰瑟賦二篇命集書之蓋有所屬集感焉不敢不書也先生之墓草至是三易矣銘其敢緩乎故為之銘曰

維昔先聖善韶放鄭律失音泯莫辯其正先生修能興遭宋亾抱器永歌教成鄉邦於皇盛德方被金石沛乎述作失此遺則疏越朱弦我則不聞欲知先生視茲刻文

牟先生墓誌銘

虞集

隆山先生姓牟氏諱應龍字伯成甫故宋朝奉郎知彭州贈通奉

大夫桂之曾孫資政殿學士正奉大夫累贈光祿大夫諡清忠子才之孫朝奉大夫大理少卿獻之子也淳祐丁未清忠公以國學博士言事忤時宰鄭清之去國抵吳興寓第而先生生清忠公喜字先生曰翁歸稍長警敏過人日記數千言作為文章志趣高邁清忠公以直道事理宗為時名臣登其門者一時人望先生皆得而交之丞相江公萬里參政楊公棟高公斯得端明湯公漢尚書劉公克莊至折行輩下之而高公薦之尤力此先生之始年也先生當以世賞奏京官輒讓其族父諸弟而咸淳辛未擢進士第時賈似道持國柄欺上罔下妄以伊周自擬眾口和附因欲致先生乃好謂馬丞相廷鸞曰君故與清忠游今其孫踐世科誠難能幸見之當處以高第先生拒之不往見及對具言上下內外之情不通國勢危急之狀考官異而不敢置上第調光州定城尉人或惜之先生曰昔吾祖對策以直言忤史彌遠得洪雅尉今固當爾無愧也沿海置司辟為屬未幾以心疾乞告歸養而宋亾矣故相留

公夢炎事世祖皇帝爲吏部尙書以書招先生曰苟至翰林可得也先生不答留尙書愧之旣而家益貧稍起起灤陽州遂以上元縣主簿致仕此先生之厯官也先生之母鄧夫人故太史李公心傳外孫也先生猶及見太史每接語終日而先生之史學端緒自此始大理公前國亾時已退不任事至是益不出父子之間討論經學以忠孝道誼相切劘若師友然自大官顯人過吳興者必求大理公拜床下得一言而退終身以爲榮而先生以元子侍左右見者感服一以爲師焉其於經皆有成說門人不能盡傳行于世者五經音攷若干卷而已先朝文獻淵源之懿日以曠遠時人無能言者或妄言以自詭輒牽合無據先生道其官簿族系月日鄉里如指諸掌蓋非直其強記如此亦故家習熟見聞然也其爲文沛然若江河之決不極所至不止時人以爲似眉山蘇氏此先生之爲學也先生簞瓢屢空不以介意門生故人或有所餽苟非義不受與人交樂易真實不以矜厲爲容談笑傾倒援引根據不見

涯埃居吳興三世矣而風致猶故鄉故自號曰隆山先生示不忘其故云此先生之爲人也先生娶楊氏奉直大夫知邵武軍恪之女先先生五十二年卒再娶程氏朝奉大夫將作監繩翁之女楊程皆眉山詩書故家也男子五人必遠必大必達必勝必昌其三入早世今必達必勝在勝程出也女四人長適蘄州路儒學教授眉山陳琛次適建寧路總管府知事河南雲謙次有疾不嫁次適安吉殷天錫孫女四人先生卒於秦定甲子三月享年七十有八以是年五月乙酉葬于湖州烏程縣三碑鄉兌山之原此先生之終也前先生之卒一年集始免先太史喪省墓吳門先生手爲書命其弟以其門人鄉貢進士陳潤祖所述平生來告曰子之言可信于世盍及我時爲我著小傳集承命不敢當將詣吳興拜先生會國史之召不果秦定二年冬程夫人之弟某縣尹晉輔以先生之子勝書來請銘曰先生之志云爾集惟家世仁壽與先生同鄉里門戶略相望先生少先太史一歲耳先生幸不鄙棄託之以

言是有以處集矣其敢以固陋辭雖然僅能書所得而知先生者
之其可信也其不知者固不敢言後之君子信其所可知則其未
盡知者可推見矣故爲銘曰

學孰爲博寶藏有作運化參錯掇拾偏駁欺世之詐文孰爲雄江
漢之東浩浩不窮補苴彌縫嘻嘻粗工有餘而藏不足而張我懷
先生豈私其鄉斯文有傳百世不誣銘以信之不其遠乎

故贈瑞安知州王公墓誌銘

虞集

昔我仁宗皇帝天下太平文物大備自其在東宮時賢能材藝之
士固已盡在其左右文章則有故翰林學士清河元公復初發揚
蹈厲藐視秦漢書翰則有故翰林承旨吳興趙公子昂精審流麗
度越魏晉前集賢侍讀學士山左商公德符以世家高材游藝筆
墨偏妙山水尤被眷遇蓋工於繪事天縱神識是以一時名藝莫
不見知而永嘉王振鵬其一人也振鵬之學妙在界畫運筆和墨
毫分縷析左右高下俯仰曲折方員平直曲盡其體而神氣飛動

不爲法拘嘗爲大明宮圖以獻世稱爲絕延祐中得官稍遷祕書
監典簿得一徧觀古圖書其識更進蓋仁宗意也累官數遷遂佩
金符拜千戶總海運於常熟江陰之間焉泰定四年夏部饑至京
師因來告曰昔振鵬官七品旣蒙恩贈先父曰從仕郎樂清縣尹
母曰宜人今位五品又蒙恩贈先父母如振鵬之秩此皆仁宗皇
帝之遺恩國朝之盛典而先世積善之效也不有以表著之是振
鵬忽於君親無以昭示於子孫族人鄉里也幸賜之言而勒諸石
焉余感其言故序次其事而并及其世次云王氏始自會稽遷永
嘉宋紹興間其先世以武事得官爲保義郎數傳爲自強生挺挺
好佛學生由字在之至元廿五年卒時年三十五今贈奉訓大夫
瑞安知州飛騎尉追封永嘉縣男配張氏追封永嘉縣君振鵬其
子也振鵬之兄龍孫爲浮屠名善集銘曰
偉哉王公卽家開封繫子之功功繇名藝仁宗之世積拜寵異先
朝文興孰究孰承慨茲其徵

周母李氏墓誌銘

虞集

鄱陽周暉與其弟明之游京師也其族父集賢司直應極實致之
 得為國子生時制書始命有司將以科舉取士而貴游不治進士
 業獨暉兄弟出篋中所習程文數十篇示人皆驚喜取讀或就問
 學焉未幾遠方獻異獸曰麒麟暉作賦千百言上之中書省丞相
 大悅以屬參知政事察罕使命以官是時陳策進書獻歌頌者常
 數十人無所遇獨暉見知時宰人人羨道暉矣一夕暉感異夢曰
 而治歸明曰兄姑留幸有以榮吾親明代兄歸矣明至家其母果
 病見明問知其兄弟在京師事為之喜而起後六日迺卒皇慶元
 年七月十九日也暉聞訃且行亟來請曰嗚呼痛哉未有以為榮
 而為感若此惟先生辱為之銘用慰其地下而已予竊感而悲之
 為次第其語云暉母李氏諱清世居邑之沙隄其曾祖松善為生
 以資顯祖時榮父天驥以文學名適周樸儒家也昔者周氏以明
 經取高科者歲相望樸弱冠受尚書有能聲及得內助事親理家

益如志常遣暉明從師而無牽於愛暉故能以卒業聞子三人暉
 明其幼祿女二人其壻程益徐璋斛田里之斗橫山其葬處也銘

曰有肅兮閨門子森森兮孔文校有饌兮醴有尊不少延兮誰怨樂
 茲邱兮勿緩

為美縣尹王君墓誌銘

李源道

君諱惠字澤民姓王氏世居中慶之晉寧後徙滇遂為滇人曾祖
 考諱世燮氏有土嘗領布變考諱連襲職天兵南指以其眾內屬
 妣張氏君軀幹魁偉識字書敏官事始為威楚屯田大使增糧萬
 石第上其功至元廿五年雲南行中書省選主定遠縣簿二十年
 遷武定路祿勸州判官大德元年調霑益州判官招逃民二百五
 十四家三年調馬龍州判官四年擢中慶路昆明縣尹階將仕佐
 郎用行中書左丞劉公之薦也省檄慮囚多所平反在縣大興水
 利安集流民為戶百五十有一五年遷同知路南州事至大三年

調同知永昌州事明年改石平州判官階將仕郎曲靖戶田有隱
 金穀逋懸省檄君往括治考覈虛實區別蠲徵人稱其平延祐二
 年省議昆明壯縣再除為尹明年改宜良縣尹階承事郎嵩明有
 獄五年疑不決御史屬君推按得情免死者十餘人六年遷仁德
 府為美縣尹兼勸農事修孔子廟以館來學時君年六十於滇城
 營江頭別墅將請老不許省復委推事建昌麗江諸道至治元年
 夏五月涉金沙江渡瀘水感瘴疾殆輿歸二年秋七月二日疾革
 越五日遺訓子孫忠孝喪禮一則古母從焚俗語畢而逝年六十
 有二越八日葬昆明菩提之西岡三娶皆張氏子男十人曰明沅
 江路總管照磨曰昇仁德路儒學教授曰慶習國言曰忠府學生
 曰益監稅曰某曰海曰良曰讓曰某未仕女四皆適右族孫男若
 千人既葬諸孤伴書乞銘其墓嗚呼滇南之壤地大矣自歸我職
 方氏六七十年朝廷置省憲以控之官府章程文物品式幾與上
 國齒振古無以侔也然其人如勞深靡落相持為習獷復喜爭尚

有禮義所不能盡化者萬里走書為其先求不朽計如王氏子者
 能幾人哉予嘗廉部徽南蓋悉其為人方以變俗為事乃不果辭
 銘之以為南人勸庶幾有聞風而起者銘曰
 維南有滇限印焚皇風遠被為樂國生斯牧斯揚乃職半刺六州
 宰四邑民鴻勞止我為息獄狂有冤我為直天之報爾亦云極子
 孫兢兢孔蕃殖喪子因俗古是式遺言四方可作則矧乃要荒阻
 重譯西岡之麓即藏室永垂厥聲有樂石

安定郡夫人王氏墓誌銘

馬祖常

夫人王氏故贈翰林直學士安定郡侯胡公諱某之夫人陝西諸
 道行御史臺治書侍御史彝之母也世為浚都鄆陵人父諱貞伯
 始宅安陽兄諱穀由地官屬出主襄陽穀城二縣簿夫人在父母
 家時雖鍾愛於其親而食與衣常後於兄嫂及歸胡氏事安定公
 持婦道終其身無懈容親紡績組紉之工弗好世之侈靡華飾以
 儉以勤相安定公家政卒能有成慈睦仁祥族姻芘之夫人有子

二人長卽治書次規業儒山東憲府辟署書吏補典寶監令史治書甫中夫人謂安定公曰是兒資穎悟可令蚤就學也遂求經師講先王禮樂詩書之義善屬文未冠令譽日著起家爲大都儒學錄大都四方髦俊輻湊於是治書學益碩大名益光顯矣省臺交薦于上歷監察御史右司都事左司員外郎工部侍郎丁安定公艱吉服浹月卽拜今官使者及門致禮意敦請治書以侍夫人榮養爲辭夫人曰兒來前吾有訓汝承吾志吾逮事舅姑汝先考及我教汝胡氏之宗事其在汝乎今國家命汝爲臺臣西南四省四憲之評議屬之汝其速行毋以我養爲辭焉治書上事半月夫人訃至徒御不戒號泣東出及安陽喪次銜哀具書告其友馬祖常曰葬不孝先妣安定郡夫人以至順元年六月六日卒將以七月三日祔葬于先考安定郡侯之墓里人杜愚爲之狀矣請吾友爲埋銘以刻之嗚呼人之生有男女焉幸而爲男子或有所樹立於世則不與百物俱盡幸而爲男子矣無所樹立使人惡之惟恐其

久生而何死之恤也夫人女子也爲女而能賢爲婦而能孝爲母而能慈從其夫子有官有封其所樹立殆過男子矣宜乎富貴壽考享厚生之福也歟祖常與治書同學古文使爲銘義不讓迺銘而授諸來者銘曰

在相安陽有貞慈母啟封湯沐賦安定畝煒其輝光夫人象服柔嘉有儀百麗于福少也稚弱玉節閨房歸于夫家組紉含章教子俎豆不繫于遷弗雕其全而人咸天詩書禮樂六藝之師起其施施居其孜孜迺成治書懋官臺臣又成典寶克昌克寅克昌克寅亦旣多淑善後無疑譬彼種稂我稼則穫且序錢鏞洹泉出山紆流相西鬱鬱栢松蒼蔚之儕允矣安定幽宮是域夫人祔之協其龜食孫子爰殖我銘不泐

桂陽縣尹范君墓誌銘

揭傒斯

大德中勳臣楚國公之季子帥湖南有所愛掾廬陵范君元亨其強敏之才廉正之節風動千里人不敢帥而畏元亨時余在長沙

數與之遇而不敢一詣門恐溷君也後二十七年會其從子匯于京師則君沒十年矣乃錄其行請銘君諱元鎮字元亨其先蜀人今居安福之清化里祖巖生二子皆爲太學生季曰景材是爲君父君早孤母劉及其兄元方教育之至元二十五年監察御史舉廉能爲江西憲掾居五年去之京師辟徽政掾又辟大司徒掾皆不就元貞初詔求能書金經者君在選中經成補湖南掾秩滿授瑞州稅使改武岡錄事攝綏寧令進郴州桂陽尹累階承事郎卒官君所至當官而行無所阿避祿入不足則歸賣田宅以給之往往初多忤而後反見知者其行事之尤著者則在帥府有田千戶者死其子曰田芑芑幼弱其弟田仁襲其官據其業而奴畜芑芑長愬于有司數年不決事上帥府復多右田仁君抱贖方力爭帥怒目左右捽君且下吏梁木壞幾壓帥帥乃止田仁恐求援行省權相數日使逮君甚急且喻之曰汝不用汝頭汝來汝愛汝頭勿來皆謂君往必死君竟往極言田仁罪反覆無所顧不能屈乃與

芑在武岡民張氏欺胡氏寡弱占其產倪萬戶脅張惠以罪取其田皆奪而歸之許文炳兄弟爭財二十年不決召其兄弟涕泣而理喻之許乞罷歸在綏寧王永明誣舒八殺人實藍姓殺之永明伏辜諸峒饑疫大起死者過半下令寬征賦以卹之諸峒嚮化在桂陽民白有盜其牛者蹤跡無所得方疑所捕二貓嗾牛耳鳴號于庭求貓主索之果得牛立命償其牛而正其罪且桂陽側陋供給與大縣等民力彫耗一以寬濟之故其卒也民無遠近皆縞素會哭哭盡哀猶不忍去前後被行省及部使者檄詰責諸郡邑凡三百餘莫不稱允而不及大用以沒悲夫君之卒實至治元年十月二十有五日年六十四以明年十二月二十有一日葬所居東北龍唐之原初娶吳氏再娶劉無子以兄之子肇開爲之子年六十一乃得子曰性傳女三人長適大都路固安州儒學正劉蒙德次適徐經遠次適蕭信之孫男三壽駿文豹天霓女一銘曰此孳孳稱所施而止於斯彼巍巍兮

曾秀才墓誌銘

歐陽玄

秀才曾氏子一漢既沒於江南其兄德元在京師聞而哭之慟知其葬有時奉行述乞銘於歐陽玄拜且泣曰人之生苟有德慧孰不願有辭於永世也弟一漢實曾氏才子弟今不幸短命父兄不能續以長願得先進一言以傳庶幾猶未死也玄聞其言惻然乃序而銘之曾氏永豐顯親里大家一漢字明善本曾似翁第三子大父悼其兄之子似翁蚤夭無後以繼之大德十年丙午五月庚午朔生天歷三年庚午五月癸丑朏死是月戊午改至順以是年某月某日葬于某里之原一漢五歲讀書數千百言過目成誦少長無童心年十二三能文十五六頎然長以弁不尚浮靡不事貨殖篤志道德性命之書能服行其言事父兄善交朋友信遇宗族鄉里之長老恭未及壯有學行辭章廩廩趣老成人初師里士劉福遠習舉業精熟尋執摯臨川吳先生門受諸經說大稱穎悟年二十有五病痰喘以死方疾未甚四月十日有厲風從西來拔並

舍大木似翁筮得未濟之巽心疑之不逾月一漢乃不起妻劉氏子男一人萬奴財四月而孤行述似翁所自作其文不勝哀有甚於德元言者嗚呼為父兄鮮有不愛其子弟者論才不才恩義有不相掩者一漢死父兄若失希世重寶不能自存嗚呼一漢子弟矣乎銘曰

麟之角麕不如殯匱之不翰轂不如暇奪其有據無與之為瘡隳其垂成無生之為壙坎而深樹而慘無重傷其父兄之心

元文類卷五十四

元文類卷五十五

墓碣

國子司業滕君墓碣銘

姚燧

觀漢諸碑凡門生為師作者其文多稱在三之義蓋本欒恭子民
 生於三父生師教君食惟其所在為言又列郡邑姓名字官人出
 幾何錢於碑陰多至百人或倍之令人每興今無古者篤於其師
 之慨至大已西燧長翰林之明年國史院編修官東平蔡文淵狀
 其師國子司業滕君之行與門生許質求表其阡以君之再入成
 均橫經文席者嘗數百人礮石所資一不借人出二子獨加異乎
 古豈不於在三足拔浮俗斯時耶君諱安上字仲禮其先自洛徙
 中山不可推采其世考府君某隱德委吏斗食自捐生君八年而
 不祿妣李夫人撫君誨曰而性質開朗記識兼人且金名士趙燦
 離孫不可以貧廢學感聖善言師西巖君克自砥礪勤心聖學暨
 其長也尊聞行知如不足日私居自持衣冠齊遯及出接物一誠

以和郡無少長相謂不字咸稱先生學積其躬道行其家化及其鄉府臣歸高薦名于朝勅教中山是府多士求親輝光警歎欲聞鼎鼎其來服縫掖者將半齊魯庭臣善其職士有聞用以職民主禹城簿壓於為監為令與丞刑或過中必揆以義馴馴上說不使黥涅妄加疑盜廢棄永世仁譽既章宣司所臨若縣與州事有未竟必檄往治裁中情法守令憚之出將入迎若事大吏徵為國子博士以其平昔自律為先蚤作晏休誨誘諄諄發蒙疏疑立懦尅剛各因其才矯拂於善黨坐羣行齒而序之其極弗率有黜與扑成均作則井然有條卽升監丞再丞太常世祖賓天成宗繼序圓丘請諡太室升祔凡厥禮文酌古損今皆所訂稽元貞之元拜監察御史京師地震上疏曰君失其道責見於天其咎在內庭竊于外政小人顯厠君子名實混淆刑賞僭差陽為陰乘致靜者動宜兢兢祇畏側身修行反昔所為以盡弭之之道其說累數十百言反覆深切有司不敢以聞君則曰吾不得於言者遂委印去反關

其家著書自怡尋起為國子司業時已疾矣顧言其子治喪無用二氏以其年乙未夏六月廿有五日卒年五十四葬府城東南崔邱里為文一本理義辭旨暢達不為險譎非有裨世教者不言有東菴類藁十五卷故江西廉訪使趙秉政板之行世矣又有易解洗心管見藏之家亦多乎哉其不年者世同哀之而文淵猶以不侍經筵職絲綸謀廟堂為憾嗚呼夫既師成均官奉常歷臺諫而又有德有言足矣奚必兼彼數者始為至耶夫人李氏貞順柔嘉姻里範焉後君八年卒子翊去尉東明自致終喪亦足彰君刑家之自今尉元氏兄弟有文行蚤世銘曰孰不曰士于學始至迄用有成千百一二允矣滕君敏脩篤行鍾鼓衡門益大其聲勅起布衣于定敦教祁祁縫掖來則來效再主禹城簿領勾稽不枉刑墨仁聞日躋滿秩而招入為胄監由博而丞俊髦是範轉而奉常禮文斯綱或革而因酌損用章遷拜御史為帝耳目言責塞求龍鱗逆觸一不見入納履而行反關立言行

後是程方微司業年過知命還啓手足理也莫竟短者已而其長斯存何以貞之石有誄言

河南道勸農副使白公墓碣銘

姚燧

彥隆始由太原徒行至河內致其父書魯齋先生願游其門未有介也乃因吾友翰林侍讀高凝得操几杖主凝家二年而歸侍其親而先生亦召北矣尋由避宅左揆以集賢館大學士祭酒國學教貴胄乃奏召舊弟子散居四方者以故王梓自汴韓思永蘇郁白大名耶律有尙自東平孫安與凝燧燉自河內劉季倫呂端善劉安中自秦獨公自太原十二人者皆驛致館下三年吾儕或病告官去而先生亦浩乎其歸乃奏有尙與公從仕郎國子助教昔者貴胄友也一旦能橫經下心事之爲師屬非其道聳是曹不可得其馴然北面俄侍裕廟東宮公爲講鄭伯克段于鄆已講而出裕廟語人曰是非空言意固有在也以國史院編修從仕郎仍助教擢奉訓大夫監察御史發阿合馬賊國諸不法彼顧誣公糾摘

非實捕送刑部獄引鄰婦有邑者教誣公嘗竊往來怒鄰婦力明其無有鞠之墮孕而事始白又糾鷹師西京宣慰使倒刺沙以已憾殺其幕僚凡是皆庸懦縮首危者而峻風節者咸偉之出僉陝西漢中道提刑按察司事燧亦爲其道副故得詳西土所爲其按厯皆分險僻荒寒諸州南而褒鳳金洋北而綏麟葭丹塗經龍門西河絕崖高可去水百尺止通一騎必遣導者先之有來騎使駐之寬所卒至則兩不可班視燒棧猶車衢也如是之地皆周焉制度卒有反者不卽覺捕惟罪社長監郡與憲司麟州人告陰濟民乘馬疾馳其識仇也問曰所懷何書濟民給以反書仇上變延安延安移文吾憲公又請往治之所牽連二百許人繼燭治之再旬是州小僻無紙至覆舊案以書適近侍臣括馬其州館鄰牆也聞獄吏呵問終曉得公姓名歎曰世有克勉其職如斯人者使人勞苦之曰吾見陛下當首聞公竟白濟民無佗特杖其給仇非宜言者公位憲諸君下會王相府伯不花右丞勳臣子開省京兆特異

禮公其按臨諸司皆拱聽者改僉河南河北提刑按察司事臺檄
 檢覈中興鈔庫中興故李夏都隸隴右河西道憲令竟事始聽東
 任公又走沙莽往復近萬里半歲而歸與其副程思廉發數縣民
 完堤以捍河水罷當暑賦民牛車轉粟入淇又改僉燕南河北道
 提刑按察司事趣裝其考已疾行至衛而卒公與兄楹郎藏衛西
 輝之蘇門周卜村南原而其妣亦疾乃朝夕哀死事生即教授于
 輝明年燧召直翰林感其毀瘁骨見衣表弔哭之子其徒數十人
 拜庭進退朋讓賓敬之道囂囂然先生成法也為歎曰嗚呼燧亦
 先生弟子者何嘗有以善及人如是明年燧疾滿告歸鄧而故司
 農卿侯爵託語彥隆或河南北農副制下必墨縷以出世議隘薄
 自便非時燧備車過衛不可留不得身見為書語其然聞方督課
 有績其妣亦卒附其考墓竟以是謝所事以至元己丑秋八月三
 日年四十六卒苦盧嗚呼學可以範世行可以礪俗而已是哉夫
 人賈也以燧平昔善公錄河南北道勸農副使苟宗道埋辭求銘

神道每一讀之一技淚擲筆數年終不能敘其事去冬以史事又
 召入翰林過輝夫人祈世母夫人為言持幣泣請且使其子覃馬
 與游其門者庭拜燧還其幣曰吾無答吾亡友者以是佐刻石須
 嗚呼非公仁義行家能使婦人如是切切惟恐沒其夫子一善可
 曰賢已公諱棟考天祿雖官而不顯居頤樂堂號頤樂先生唐白
 居易家狀云白姓家太原者楚熊君孫勝白公見殺於楚其子奔
 秦孫乙丙與裔孫起為秦將封武安君賜死杜郵始皇思其功封
 其子仲太原公豈其苗裔耶銘曰
 聞古五十年不稱天公是不盈天道未曉學不篤耶得譽先師道
 不行耶裕廟嘗知職不舉耶三憲著效力不本耶耕播之教況冠
 解角敢言人難彈射柄臣聽者毛寒猶枚其外未及其內視親于
 喪觀婦于介靡一匪善靡一可涼非我友私月旦章章嗚呼白公
 耳孫猶令其貫古松歲遠滋勁士不盛位而盛吾賢盛位者衰盛
 賢日延有方其趺有剡其首碣石阡隅千祀無朽

河內李氏先德碣銘

姚燧

至大庚戌郇王府長史兼經歷典食司與所部人匠都府官李惟
 恭持其鄉士席雲漢狀其祖潤文王使懷之利用庫日民調商征
 之人吏祿公須之出不遺於受不僭於發如他人侵蠹以溢其家
 負而責償罪沒產者皆無之與交人以誠御下以寬禮賢樂善者
 求表其阡燧曰管庫之官則古委吏亦下士也所可筆者豈專由
 孫貴耶蓋郇王之考初尚主世祖再尚主裕宗自稱晉王克用裔
 孫為置守冢數十戶於鴈門禁民樵牧由分地在高唐即是進爵
 為王世居靜安黑水之陽為廟以祠孔子元貞始年表賀聖節獨
 書漢字庶其尊禮斯文者惟恭今臣其子觀其所事者賢若不可
 辭矧有大此者懷之為州憲宗大封同姓初國世祖于秦以戶寡
 益封之至元之末以封其孫順宗既之國未至疾返成廟賜名懷
 寧以王今聖時方撫軍于北皇太后儲皇往居者二年則懷為三
 聖龍潛之地傳曰小國之君當大國之卿為下士是邦者當宜何

哉則君善職管庫者不必言矣卒以大德乙巳三月十有八日
 年六十七垂絕猶念惟恭不置曰吾平昔鍾愛是孫今遠宦數千
 里不及聞吾願言可憾也哉妣王後二年亦卒二子從鼎從信孫
 則惟恭其長初由王府郎中羅忠國使懷聞其好學慤有立志遂
 與偕北即壻其家進之於王王甚禮之言無不從事必見咨妻卒
 賜楮緡二千五百為娶元氏子李惟寅銘曰
 荀卿子言臂非長升高而招所見彰斯若可用為君方惟懷為州
 河之陽實為三聖淵龍鄉其間下士雖守藏或小大國君卿當其
 貴可參攀鱗翔況復有孫翼賢王遠塞而近孔子堂仕優學以能
 自疆何畏潛德無輝光

故提刑趙公夫人楊君新阡碣銘

姚燧

維蔚州蜚狐趙氏系不可遠本繇今江西湖東道肅政廉訪使秉
 政而上推得二世祖崑金帥府評事卒葬其鄉二子珪瑄珪將萬
 夫戍蜚狐後遷刺蠡州留瑄在鄉守舍天馬南牧度形勢不支倡

縣民以城下之從太師國王徇地至蠡其刺猶城守礮殺王悍將
蕭大夫王恚欲阬城公請以身贖母兄死王哀之併全蠡民以戰
績每最進冀州元帥虎符復推與其兄廷議多其悌讓改公冀州
軍民總管別錫虎符入覲受知睿宗承制監易州再遷行省中都
金平監中山府當憲廟世世祖方淵龍收召聞望之臣求治道之
宜今者置經略司于河之南宣撫司從宜府于陝之西行部于秦
都漕于衛東西二千里道不拾遺而刑則今中書右丞相之祖封
國政弛民散最號弗治求潛藩制官惟歲入其貢賦爲置安撫司
後刑易爲順德升州爲府乃以近故太師廣平王從祖脫兀妥與
公爲斷事官位安撫上公年盛強俾與開國勳臣苗胄爲友則潛
藩期任公者已不小矣世祖踐極制監眞定路位總管上俄遷順
天路宣慰使肇置四道提刑按察司以公使燕南河北轉使河北
河南累章請老不可年七十九始聽歸卒年八十三以監中山有
田朱固鄉不返葬飛狐卽塋是鄉堯封原亦昭時崇顯壽考人也

夫人既同享有其樂公當不恙亦以官植業順德盡析秉政夫人
從養及子貴食其祿以終年八十二不及公才一年何壽考萃是
一門哉因惟女子子天父天夫者也父不能必子之貴能之者夫
子焉耳而難其全今之儲才將相係望海內者每在乎風紀之官
夫人以提刑使之妻而母廉訪使詩曰教誨爾子式穀似之彼奔
葉襲芳不隕世德夫人之功亦鮮儷哉古邦君之妻邦人曰小君
禮士喪妾不得匹其夫必曰君妻曰女君後世封羊祜妻爲萬歲
鄉君則令甲郡縣君之原可爲今不敢氏夫人而君君之凡其不
反葬中山卽別塋順德李馬村若不同穴記稱合葬非古也因求
之吾家舊州都督文獻公開元宰相考也葬陝之峽石百官咸會
焉及妣夫人劉卒則葬萬安山萬安嵩高西趾去峽石二百里耳
以唐相之貴月入俸錢三千緡有力不足於至哉則不合祔者亦
從古也今秉政斯兆未必始亦由此燧以其於古有徵爲發之夫
人生三男二女男秉政秉彝秉衷女適焦簡周某孫男女九人秉

政又曰吾他日亦域是嘗聞諸師古人不諱死惟不趨取死之途
今之人鼎鼎焉惟死途之趨復苦諱死亦惑哉如師之言則秉政
不徇流俗語身後事於其生亦庶幾古達者也銘曰

襄國所直趙南魏北其西太行冀方四塞求田惟良宜莫如襄衍
沃平平千里其疆生家其閒後卽斯瘞奚取日者風水焉泥孰陪
平原如阜而尊左之右之昭婦穆孫天厚其門既壽既祉流澤淵
淵未艾來只世生顯人如夫如子

故金甄官署令魏府君墓碣銘

姚燧

燧還吳中過廣陵日今嘉議大夫行臺御史中丞初請曰吾祖靖
肅公顧言以吾曾祖甄官署令卽死所藏亂離失其處他日必虛
爲邱先塋石載其事無使吾先人魂遊徬徨無所於歸而一善之
或遺也子義爲銘隨又遣其少子可亨挈舟廣陵五千里追之襄
陽不及返而及之鄂授其考所輯家塾記曰掇是事銘嗚呼確哉
遠而勞焉迺本之曰魏氏繇唐相知古子林刺朔州子孫居桑乾

桑乾爲今弘之順聖遼有延恕者生中奉大夫守成中奉生通奉
大夫餘慶通奉生兜答館酒使子貞兜答實生甄官署令君諱允
元改德元字信之甄官生進士特賜及第笏特賜生思廉卽記家
塾者思廉生初初生翰林修撰必復可系者是九世其大于金繇
兜答弟資德大夫參知政事柱國鉅鹿郡開國公子平相世宗致
治隆平祖考中奉通奉再世官皆以公貴贈兜答及子隴右令景
元甄官與逸其諱一人再世官皆以公貴廢君始監順聖酒改弘
州酒使鄧州權使抽稅設防有方與宜平不增斂姦無走匿額有
羸籌民不苛之入副堂廚庫又爲使改文繡翰林兩署令同知易
州入令裁縫署改令甄官署以卒年六十三官止廣威將軍夫人
高氏七男笏琬瑜琦玠璠玉琦太中大夫行部侍郎玠朝列大夫
延安司獄璠翰林修撰今諡靖肅公與特賜皆以明經進士官琬
懷遠大將軍耀州庫使瑜監豐利酒皆廢官玉進士未祿卒二女
一歸同知荊州節度使事秦德美一歸其鄉右姓孫氏君究心本

富計田疇第舍牛馬雜樹直可爲錢千者五萬歲入粟爲石者三萬歲抽五十一爲七子求師取友須令節休旬大集衣冠令枚誦所業覈其進惰已則鴈序立前侍飲前修聲輝耳目漸涵化淪其心繇是成德達才多萃其門章宗甚嬖李妃夫人視妃母王姑也數召通籍禁中不可後從秋獵易州君方除道橋諸水復召曰吾思與若舅弟語久矣終不能一致今行之所在是而夫子倅是便且時也無終見避之深夫人以君出不敢專行俾子瑜請之亦不可曰是家膏也親將污人人有爲不善者不畏取戾府縣惟憚君知兵興下令急甚敢有舍奴婢亡命不告者擧及其鄰人猶利其傭輕私役之覺則殺以滅迹或致大獄君時鄉居間有出入非常者召問得情嚴其錮防書致其主歸之約示薄威以懲其再無殘其生終不語其主以獲之誰舍所也比卒免家僮久故者民之作詩與斯世訣沐浴冠衣揆日而逝君之孝友天得非學其使堂廚以鉅鹿公子叔元未仕曰大臣子故屯其膏澤不見及耶三求推

所居官縣官以故事無有不可又恤其無子以靖肅後之靖肅又無子顧言後初則甄官子孫世世圖報鉅鹿者何如也其家塾自序曰繇吾季曾鉅鹿輔政茲降修仁潔義可謂曰久仕之達者列品而九不過中中天嗇爲報將待夫後之人耶最初之仕外僉提刑司事爲副爲使入爲監察御史治書侍御史侍御史御史中丞三十年間風憲之官無不揚歷司清議者猶大有期曰將不已是於今嗚呼自序君其知子哉矧必復於靖肅公克世其官可大可久與亨學行巖巖可述銘曰
反覆觀先民吁可哀積充報銜身期後來門令容駟馬堂三槐必貴於天者如取懷惟中奉亦然祥用獄至鉅鹿再傳旣鈞軸官不私其子甄官承承三遜其季叩莫膺又仁厥乏祀修撰繼官以祀比言祀則大以今修撰孫後者再小宗旣顛蕃大宗賴藏偶失故所魂依依招之從先墓來如歸膺膺桑乾原終天地碣孰華其文太史燧

翰林修撰致仕董先生墓碣銘

元明善

揚州總管王君結余友也駟過其家中山授余崔助教詠狀曰此
 結師也幸公銘俾諸孤刻之墓神道是不沒吾師矣余以義不得
 辭諸總管則取其狀讀之曰先生姓董氏諱朴字太初隱居五十
 年壽八十五以卒嘗為陝西道按察司檢法太史院主事俱去之
 集賢院臣奏其賢特授翰林修撰承務郎同知制誥兼國史院編
 修官致仕先生之學蓋明理為本篤行為要最其所至則文雅安
 恬者也其教人也善因其才而究其器故千里間化之學者不之
 字號曰龍岡先生先生朔州人曾大父遷邢著戶版大父資祿妣
 韓父彥成妣李農焉先生穎異過人學於樂舜咨劉道濟遂以儒
 顯娶張生三子一女先先生卒二十七年長子慶雲次子慶元慶
 隆女適張德祿孫男四曰壽寧祖寧叔寧蘭寧孫女二曾孫男三
 曰長孫和孫澤孫曾孫女三先生卒之歲為延祐丙辰月為辛卯
 日為乙亥葬之日為己丑其兆在唐山之陽云夫含光蘊秀蹈高

遵素惟潔身之士乃能行之惟有道之朝乃能容之跡其臨莅銘
 之也宜辭曰

龍岡之支淵淵以池種蓮于茲而我茅茨池水之清比其風靈蓮
 花之馨配其德微猗嗟後生于考于評仰止斯銘于載而鳴

監察御史韓君墓碣銘

張養浩

君韓姓諱克昌字勵夫汴之太康人其土世遠不能系大父贊隱
 德不耀父椿官至淇水巡檢君甫冠以孝廉辟吏河南陝西二憲
 司尋登掾刑部歷臺若省論事据正不撓所至表表有聞後刑部
 缺主事眾咸屬或謂資淺執政曰用人耳遂授君其操履益確嘗
 有兄弟五人為盜或論為強於法皆死君閱其牘愀然曰弟從兄
 者也今若是不幾族乎乃議最幼弟減死上之省可其讞闔部歎
 服其他指迷趣緩稽舊蔽新凡所當為靡遺餘力時長官有媚其
 顯者君曰上領其槩下任其繁此自通制余何顯然以疾屢在告
 眾史軫其憊不煩以細惟重碎則正是焉久之懼事壅職弛舉浙

西廉訪司經歷丁某自代用是改承務郎太常大樂署令甫上拜
監察御史進儒林郎雖力疾就職未嘗辭劇避難建言如皇子師
友非人起居注不舉其職覈徽政成案言國庠學規省官節財審
令慎罰數事皆剴切時務為慮深遠未幾河東憲司有不劄上者
臺臣為失風憲體奏君即治以訊慨然趣行或以疾止之君曰御
史與散員不同吾心視常人亦異況死生命定顧可以微恙使吾
有不職罪耶乃決意往回及半途病果劇以延祐元年八月二十
九日卒官于威州陘山驛春秋四十又三訃至公卿大夫士無不
悼惜娶董氏一子元善從仕郎濟州判官君性端介峻儀字讀書
務措諸實用論議踔厲臨政稜稜有風望外若自用而理所折衷
則舍己從人如弗及故不知者頗以為狷余為右司都事時君掾
省以嘗其事故知之為深嗚呼惜其年位不究而止乎此也雖然
湛盧豪曹不必陸剽象兕而後知其利肅霜要褻不必路極九有
而後知其良古人韞奇櫃異囿於小官而不獲伸者何限遠曰其

才已是可乎哉此余所以器君之賢而又軫其施不廣且悼夫大
勳不及書也然有其具而未盡其用則有非我所能必者庸何傷
哉庸何傷哉是為銘

吏部員外郎鄭君墓碣銘

虞集

鄭君諱大中字義甫早學於鄉校稍長推擇補中書戶部令史歷
詹事掾史出官登仕郎納縣總管府經歷仁宗皇帝在東宮時嘗
因事得見仁宗偉其人目左右問其姓名是時仁宗愛尚文學常
不次擢拔材儁於眾人之中人亦率更名所居業以自傳會驟得
顯用者甚眾而君略不少自銜鬻才得為中書掾掌選調陞吏部
主事以廉敏為丞相器重而君丁內艱去國服闋除東平路推官
終更又除嘉興路推官甫召為吏部員外郎官奉政大夫且嚮用
出調廣東官於江西歸至京師以疾卒泰定二年七月二十一日
也享年五十五公材行過人視當世顯用者未見其遠相遠數寘
省部要地皆不得久又常以文書為職業事無專制獨為推官時

東平屬縣東阿誣民爲盜者獄具矣理出之壽張童子以杖爲戲
誤中人死縣論以殺人之罪君持不可刑部是其議山東大水民
多徙死檄君賑給者多全活嘉興浙大郡獄尤夥君決遣之數月
迺至無事憲府以其狀薦之其治績可推見者如此娶何氏封眞
定縣君三子重承事郎太常禮儀院太祝量野未仕三女皆幼重
爲國子生時與今史官蘇天爵爲同舍而集爲博士故其葬君於
眞定之三家原也以天爵所述狀來請銘按君之先世本契丹貴
族石抹氏後改從漢言曰蕭氏君是也有仕金爲謀克謀克者金
人之言謂帥百夫則冠以謀克爲官名云貞祐南遷以其兵戍洛
正大庚寅國朝兵至戰死其配楊氏亦以兵死而其子顯七歲矣
爲千戶鄭公所得鄭異其資不凡以歸與妻霍夫人鞠育之千戶
公竟無子而歿遂以爲子因姓鄭氏而母事霍夫人終身有恩禮
是爲君之考以君貴贈奉政大夫樞密院判官驍騎尉眞定縣子
妣尹氏贈眞定縣君而君又有兄大章中順大夫濟南萊蕪鐵冶

提舉與君齊名而皆不究其用具書之俾後世知鄭氏有以石抹
氏改者自眞定諱顯者始其銘曰
氏族之興氣禪體承似續祠烝匪信曷徵維鄭有良吏維遼是自
銜德懷誼不敢敘其紀爰著因始俾永詒孫子

國子助教李先生墓碣銘

虞集

東明李先生爲國子助教時集後至與先生爲同官先生所居齋
諸生多年長豪俊之士先生朝夕授之經懇款有程方重純篤授
業者知以質行爲貴集少先生十餘歲嘗觀其不可及以自勵方
是時故平章政事高公昉故翰林學士元公明善皆先生鄉里雅
敬先生而高氏又與先生家連姻二公赫然用事於朝先生歲時
往來之外未嘗有所私謁處士張子素好立奇行自表樹袍冠布
刺口言天下事常傲視一坐人亦少先生數歲先生以鄉里待之
甚勤至子素益加敬愛嘗從駕上都分教諸生之在宿衛者比還
中道驛吏告乏馬以牛車進先生食已攝衣升車無一言驛吏更

相誦以爲不當斬長者而從者亦愧服先生居五六年有傳其子好文所著古文數十篇至京師故御史中丞張公養浩與元公皆以文學自任一見驚異卽列薦之於朝先生慨然曰斯文之事屬諸吾兒可也至治末集自江南召還則先生已去世而好文登進士第歷史館奉常復得爲同朝集見其深靜有學未嘗不歎先生之有子焉好文來言於集曰昔先君之在朝也招撫府君之墓得姚文公爲之銘鄆城府君之墓得閣文康公爲之銘先君子歿而諸老盡矣同居成均者惟予在焉敢請銘集誠不敢附二公之後而與先生父子厚善豈敢辭按李氏世居單州諱訪金義軍提控生子聚金亡徙大名之東明大帥阿朮魯版授軍民招撫使生庭王鄆城令先生其第三子也諱鳳字翔卿幼嗜學休沐不廢從鄉先生孫曼慶學詩久之曼慶謂先生曰詩吾無以加子矣其爲義理之學乎先生乃屏絕金末律賦舊習而究伊洛之遺書寒暑不懈嘗鬻鬻未孰而臨卷有得不知釜之焦也初從太史氏測

景陽城留居嵩穎開讀書三年而後歸爲郡學錄鄆城病還東明遠近學者從之常以百數稍遷廣平學正大德丙午始除國子助教在官兩考餘有司以常格除臨胸主簿到官未久卽去之延祐丁巳八月己酉終於家年六十有四以好文貴贈從仕郎郊祀署丞加贈奉議大夫太常禮儀院判官驍騎尉追封東明縣子夫人王氏故太醫使康懿公安禮之從子也通經史善相其夫教其子以有成初封宜人加封東明縣太君就養京師安貧而篤於禮至順二年十月甲子卒年七十有七子一人好文也女適王思柔孫三人洙浚潞女孫二人皆幼好文奉母喪還東明將以三年三月丁酉合葬先生夫人於黃頭里之先塋先生雅好巖壑而所居遠於山得奇石積之齋前以爲山日對之而吟諷先生著書甚多而不甚存藁所存者有詩數百篇曰西林集西林者先生所居也銘曰先生之容鬱乎山岳之蒼蒼先生之懷浩乎河海之泱泱用世不

多斂而歸藏子以文興于先有光我表西林來者不忘

征行百戶劉君墓碣銘

馬祖常

趙郡蘇天爵述其外大父劉君行實乞銘於馬祖常曰先妣武功郡君昔安樂時念其父不忘懼其善不傳而名遂泯泯也嘗以語天爵迨先妣棄世外大父終不得銘天爵蒙慈母之教誨粗有樹立於時圖所以繼親之志者天爵其可不勉祖常曰孰無親乎孝於親之身者尚矣矧又能思廣其親之志乎乃爲之序而銘之序曰劉君諱成字立甫貌魁岸奇偉讀書涉大義不事章句歲壬子國家初籍民田襄鄧間君與其兄俱在行中兄弟勤穡事每代兄作勞田官稱之久之從伐襄陽先登授百夫長嘗率數十騎略武當宋邏兵四合屢突圍出皆不勝或欲降君殺馬爲食居數日不降宋人疑其有誘客引去眾服其勇丞相伯顏將大軍渡鄂州江命別將阿里海涯率萬戶張興祖軍分徇湖廣地君復與其兄從破羅飛文才喻周隆黃必達張虎諸軍薄靜江兄中瘴毒死君扶

其柩而北葬旣襄事輒屏迹田野課僮種樹畜牧耕桑衣食以自給於湖南遇兵倖一儒生黎姓用金購之曰此儒生不善力役歸我我將俾爲弟子師果同歸教諸子於鄉餘所全活者眾此儒生其一也享年八十有四以延祐三年正月十又二日卒葬真定平樂原先考萬戶府君之兆考諱義起行伍元帥史天倪辟署權黑軍萬戶會副將武仙殺元帥叛卽從元帥弟丞相天澤擊走仙轉戰兩河平金有功妣夫人孟氏夫人董氏前君廿六年卒子二人曰寓曰海孫二人曰允中曰弘中女一人故中憲大夫嶺北行中書省左右司郎中蘇志道之夫人追封武功郡君今奎章閣授經郎天爵之母也女孫四人一適奉訓大夫萬盈倉使李恕一適張林一適侯閭其一幼也世本厯城人金季山東河朔兵興賊雜蹂躪醢其民獨真定城完君之考因占籍焉而今爲真定人者自其考始郎中蘇志道年少日君識其爲令器以女歸之後其甥天爵又以文學進有官于朝孝而能成母之志俾其外氏之官闕世次

刻於金石者竟賴其力焉銘也無愧銘曰
振振劉姓考室眞定挺身兜鍪而官弗崇雖則弗崇勇也匪躬斬
馬啖卒出金購士其謀則懿其惠則侈其迪其啓以多孫子女實
命婦副笄封君出甥維彥日肆於文克表外氏纘茲勞功刻峙墓
門維以亢宗

監黃池稅務王君墓碣銘

馬祖常

王君元父既歿之十一年其子國史院編修官沂茹哀請於馬祖
常曰子與予同登進士第又同官于朝先人生世以迄于卒其行
誼無愧而終齟齬以不合於時者子能知之其宜揭以傳後者子
宜爲文沂之述諸狀者子宜加詳焉按王氏出姬姓周畢公高裔
孫萬事晉更十世得列爲諸侯滅於秦子孫徙雲中地今之弘州
六世祖遼戶部侍郎山甫始著於家牒子三人曰元節密州觀察
判官生詡金左司員外郎以文學稱蓋世閑遠矣曾祖諱銳金尙
書戶部員外郎祖諱國綱金監察御史使河中詰總帥完顏仲德

戰敗死節考諱振艱關轉徙占籍眞定力學砥行起家至江南淞
西道提刑按察司經歷配丁氏有子三人長諱宗禮季諱宗義皆
早世仲卽君諱某幼自知問學侍經歷君居浚都爲士子經師尤
長於詩詞試浚都文學掾辟江東道宣慰司令史會使專恣他吏
恐諛弗敢仰視君每以義持之屬歲澇饑羣無賴起績溪盜攷相
蔓民不輯寔宣慰司遣君覆視還請蠲徭發廩以賑忙隸盜遂息
進將仕郎宣城縣簿縣比歲供丕面黽四十畢果不獲則轉購他
邑糜貲毒民君至請悉罷貢姦民有詭逃田賦者歲取償里胥吏
循格不究君一正其籍乃建孔子廟築壇崇社春秋飭其牲器以
與邑人行事川有梁田有溝道有寓望吏徒有畏而弗肆民知有
政而趨功監司郡守爭爲鼓譽江淞行省屬錄寔國太平二郡囚
又屬覈考江陰錢穀他州縣訟累歲不決者多以屬君所試悉有
能聲江陰盜有枉爲脅誅者吏黨按之既誣服已君反覆得其情
爲具獄自行省事上中書移刑部刑部允君議遭脅誅者得免死

南陵縣僧以貲雄持縣短長堰溪水溉私田霖潦水溢則漂沒崩蕩邑人訴於縣吏懼莫能施行君詣視毀之老幼至撫手拜慰且曰君出一鄉於魚蟹矣未幾擢江浙行中書省掾曹無留事適潮西廉問官與君素同里少持氣不相下頗嫉君君又不自詘以希合乃風旨豪梗羅織君以是坐誣免不辨起除瑞州平準庫使不就改仁和鹽場司丞又不就家居數歲又改除平江行用庫使州縣趣曰君所與游盡一時知名大夫士咸燭君冤而君終不自訟就使終不赴孰與君直乎忍是一往而無變君素守以流於物將推歷君之迹當不誣矣寧無爲君采於有司也君不獲已就官久之自免歸階前資遷承事郎監黃池稅務以至治三年五月十三日終於家享年六十有七以某年月日葬於某州某里之原娶把氏穎州判官時之女男三人澄沂洙女一人適浙東廉訪使侍其同朝之子通孫男二遷善崇善孫女二人皆幼君甫冠卽自立勤苦爲文章履其身以廉儉亦未嘗過爲崖機其官業行己之略一

皆自信不妄計進取少顧時人之所爲而亦以此稱之然亦以此嫉之至大閒嘗爲書言任人別邪正養民重守令法不可輕更令不可輕出期少施於朝廷而書不果上執政聞君名私使人致款欲官之錢監君知不足與共事卒謝去後果敗而君益畜其學以老不克用鉅公聞人累薦君才宜理劇文學宜館職皆不報屏居錢唐詩書尊俎詠譎息偃泊然無毫髮世俗慮撫育諸孤子嫉誠愛天至而急人之窮獎人之善汲汲焉猶負宿諾而抱隱痛皆他人所難而君爲之不知爲有德尤人之所難也其所著有政要書十二篇陶詩注三卷詩一卷嗚呼天興之變國土厖裂焚剽翦薙不百年而金之名家善士之子孫遺子不數戶矣初御史君以直節死人惜其未能大用於時夫固知經歷君之起王氏也經歷君位不配其德以歿于今凡幾年而承事君又斥不用君子悼曰不幸然孰知後世之將昌且久歟今沂以進士入官有古學方嚮於用而克濟其美於未艾豈其碩大光顯又將在茲歟是宜爲銘銘

所以使後世爲善者不怠也銘曰
冕弗媒也玉有玦也一擯不用有子哲也彪炳而文立其皦也載
善於銘行安轍也

處士甄君墓碣銘

宋本

應奉翰林文字真定蘇天爵伯修父持所著處士甄君行狀求銘
其墓曰君鄉之先達諱昌祖字茂先師侍其先生軸交秋礪王公
憚俾天爵狀以銘謁予者其子恆志也銘曰
舜胄氏甄代遐邇君世有繫遠益略茂先昌祖字諱錯無極徒恆
遂地著曾祖公亮德潛爍祖讓事金刺嵩洛考用致位民部幕妣
劉繼王淑相若君讀六經得大約母王滌隨老致樂築亭訪山在
負郭木石與居隱操襟師軸友憚敬不謔言倍行過期救藥經史
傳集浩以博重屋丌冊示尊閣修名鱗然日孔炤蜀憲聘掾以養
卻戊申月正體魄落歲六十二瘞諸俗儷代之王賢以媿肩恆補
吏晉臬擢女章變兮死未灼子子克敏齒踰弱王侯不事斯道卓

幹母之蠱子職恪懿君學易協準獲顧親小祿辭不諾惟古逸遺
名不鏤賴士載辭傳磊砢抑本茲銘不已作誰之言者蘇天爵

元文類卷五十五

元文類卷五十六

墓表

錦峰王先生墓表

楊 奐

先生姓王氏諱仲元字清卿家平陰廣道先生之猶子明道先生之子世以儒道著一時名公鉅人若党懷英趙渢皆師尊之先生舉進士有聲承安五年四舉推恩資高雅清苦寡言笑無雜賓嘗知阿干縣憲司以簡靜聞退食擁琴書不出正襟危坐似與世相忘也遇會心者雖對談竟日未聞涉貴游可喜事人信其為古君子也而書名尤重小楷介歐虞閒用薦者召應奉翰林文字同進士入玉堂自先生始改陝西東路轉運司鹽鐵判官適書藍田山碑飲玉漿偶得疾死于官舍貞祐四年也死之日家無餘貲藁葬城南鴈塔之陰鄰永平王尙書擴墓經兵寺宇廢盪荆棘埋沒迷所在後三十八年尙書子元卿至審其在墓西十五步初元卿許並負而東既而恐親族零落無可歸甲寅五月九日奉天楊奐感

念平素會長安邳邦用揚天德來獻臣同德張琚高唐趙安世析
津張傲燕南毛居仁耿都陳及雲中孟攀鱗太華郭時中鄆郊范
文炳平陸員擇加以衣衾藏之故穴蓋有待也

卓行劉先生墓表

王暉

先生諱德淵字道濟襄國內邱人性癖直有操守好學能自刻厲
及游淳南王先生門思索辨惑等說自是饜飶史學爲專門之業
非禮義不妄言動一介不取於人朋友死雖千里遠徒步必至覩
前賢奇蹟偉行擊節嘆賞而不能自已至椎耕牛以饗寶王殺乘
馬而祭昭烈其或憫時之艱急人之難切於已私而不置也始則
人大以爲異旣而疑焉終迺歎服曰先生篤行直躬守死善道者
也北渡後赴戊戌試魁河北西路建元三府辟其行能授
翰林待制晚節知圓鑿方柄不能與時匱匱乃以所成學
立言傳後著三爲書數萬言其說爲天地立極爲生民立本爲聖
賢立法敷析温公通鑑數百條扶翊章武俾承正統及見考亭綱

曰書多所脗合沾沾而喜曰吾天地間可謂不孤矣又通古文奇
字士多傳習之凡經指授者雖節目礫礫表表有所立或惜其獨
善不顯諸用然振衰善俗激厲後人多矣太保劉公左轄張公以
鄉曲義來周卹皆卻之曰吾非踽踽涼涼闐然媚於世者也至有
以禮願交而弗之允者魯齋許公每道邢必式閭致恭而去王子
秋子始見先生於胙對榻學館夜半欵起撼予曰吾於漢丞相亮
論議際有所得惜不並時當有說云云至元壬午予按部夷儀謁
先生於天貺齋樓遲蓬華心融一天自樂其樂英發之氣至老不
衰先生近何述曰適作四凶辨天府七星挽章予以張皇幽眇振
濯漢靈一何壯也臨訣握手予曰吾耄矣斯文未喪子其自將旣
而聞臥疾慮乏調養詢諸友生始知先生有子樸早世女孫一適
康氏子新婦女孫皆不聽侍疾卒年七十有八時至元丙戌九月
二十二日也葬順德之西邱里後十五年晚進王甯合鄉國議來
請曰先生學貫三才養素邱園行媿於古人望高乎一世沒當易

名用垂光範予謂甯曰士風之不振也久矣安得高風古節如先生者哉昔孟東野以詩鳴唐張籍私諡曰貞耀程伯淳以道自任潞公揭之曰明道今扳二例如以卓行加之則名與行為顯允矣門生戶部尙書戎益礪石表墓以圖不朽翰林學士汲郡王惲爲之表

孝子田君墓表

劉因

嗚呼天地至大萬物至眾而人與一物於其間其爲形至微也自天地未生之初極天地既壞之後前瞻後察浩乎其無窮人與百年於其間其爲時無幾也其形雖微而有可以參天地者存焉其時雖無幾而有可以與天地相終始者存焉故君子當平居無事之時於其一身之微百年之頃必慎守而深惜惟恐其或傷而失之實非有以貪夫生也亦將以全夫此而已矣及其當大變處大節其所以參天地者以之而立其所以與天地相終始者以之而行而回視夫百年之頃一身之微曾何足爲輕重於其間哉然其

所以參天地而與之相終始者皆天理人心之所不容已而人之所以生者也於此而全焉一死之餘其生氣流行於天地萬物之間者凜千載而自若也使其舍此而爲區區歲月筋骸之計而禽視鳥息於天地閒而其心固已死矣而其所不容已者或時發焉則自視其身亦有不若死之爲愈者是欲全其生而實未嘗生欲免於一死而繼以百千萬死嗚呼可勝哀也哉先人嘗手錄金源貞祐以來致死於其所天者十餘人而武臣戰卒及閭巷草野之人爲多而予每覽之未嘗不始焉而慚惕若不自容中焉而感激爲之泣下終則毛骨竦然若有所振勵者故爲之訪諸故老揆諸小說考其姓里增補而詳記之惟恐其事之不傳也近復得清苑孝子田君焉貞祐元年十二月十有七日保州陷盡驅居民出而君及其父與焉是夕下令老者殺卒聞命以殺爲嬉未及君之父者十餘人而君乃惻然欲代其父死遂潛往伏其父於下以兩手據地俛而延頸以待之卒舉人未暇省閱君項腦中兩刀而死夜

及半幸復蘇後二日令再下無老幼盡殺時君已以藝被選而行
次安肅矣聞其父死謂人曰我當逃歸葬吾父遂歸求父尸而得
之負以涉河冰傷脛至血出發母冢下尸而塞之乃還而眾不之
覺也嗚呼此其所以為孝子者歟其子道章資高爽喜讀書而遺
山元公陵川郝公皆嘗為詩文以美之雅善予一日狀其父之孝
行訪予於易水之上且曰古者孝友雖庶人得書於史官而先人
之孝行若是生無一命之旌而死遂無一言之記以傳不朽為先
人子者亦何以自立於世今謀所以表夫墓惟先生實哀之言已
泣數行下嗚呼予尚忍不銘君也哉君諱喜世為保之清苑人其
仕至佩金符其壽四十三其卒則歲乙未閏七月考彥妣喬母兄
嘉其所娶實望族韓有婦德鄉里稱為韓孝婦其壽八十六男女
三道昭道章裴氏女寅孫五溫良恭儉讓曾孫四元亞季德昌銘
曰

嗚呼蹈斧鉞而致死猶淵冰之歸全其死者藐焉此身之微其全
者浩乎此心之天有纍雖邱匪邱者存有圓雖石匪石維文百世
之下有旌古而勵俗者必名此曰孝子之原過者其式之孰獨匪
人

故宋兵部侍郎徐公墓表

徐 琰

國朝自至元初元用兵襄漢以來驛書狎至日告克捷既下襄陽
渡大江所向風靡有城郭封疆之任者若崩厥角恐後卒之混一
區宇際天薄海罔不臣妾是雖廟謨雄斷師武臣力之故而江南
謀國用世之士亦從是可知獨時時聞趙卯發死池州李芾死潭
州馬暨死靜江如是者不過十數人止最後又聞文天祥以宰相
使軍前遁海上被執不屈久乃伏節若可起人意者而於先幾之
識前知之見未之敢論十數年來南士車馳轂擊北來不絕閒坐
論對語及其所以亡者則深憂遠計危言剴論之士亦嘗有之而
枋用非人以言為諱抑而不求求而不聽聽而不用是以馴至此
極始知人謀非盡不臧抑亦國運之有所窮而天命之有所屬故

不得不歸於有德也嗚呼是豈一人之力一朝之故哉今觀余君
憑所狀故宋尙書兵部侍郎徐公之行則前言信有證不誣公諱
卿孫字麒仲臨江之清江人曾祖源祖大經父森贈宣教郎妣熊
氏贈宜人按狀公在宋朝起身儒科卽以治縣最當時其事蓋不
勝書人視以爲譜升朝一再遷爲御史爲諫官垂三年時其國之
事莫急於邊備初見卽以勵人才飭軍政結民心三事爲告襄陽
之不守元帥之無謀我軍之在行者猶無不知之而彼相挾私蒙
蔽上下略不正其僨軍之罰位於朝者視爲軟熟恬不之怪獨公
能抗議彈擊第一義已甚可觀繼是累十百疏反覆諄切無非論
邊之日言大而遺其細謀遠而不略於近料事精密置論切直
使吾徒爲其國計亦不過爾取是謀帥而拔李芾於久廢薦文天
祥於列郡以襄事而陳李庭芝之決不可用卽責時宰陳宜中循
行故事如坐而待亡其後或抗節死義或誤國謀身無一不如其
言此則非知人如權衡識時如著龜則世孰能之殆天與爲謀神

授之策者乎不用其言而用其身雖簪筆持橐把節持麾於我何
加至是公去蓋益遠矣國亡未幾而身亦隨之悲夫余閒居坐念
自有宇宙以來亡國何限以爲其國之有人則其時其事言之可
爲太息以爲無人則斯人斯言散在史傳何國無之而卒亦無掾
於須臾之運者信在人則在乎用才者爲何人在天則亦願迂續
者之何如耳後有君子論一代興仆之由於千載之上其有取於
吾言乎若公之文學政事散見如狀以非大節所在故不詳錄公
生以宋丙戌二月十九日卒以至元庚辰三月十日葬其鄉以至
元丁亥十二月二十四日娶楊氏贈宜人繼黃氏封宜人子男二
長震先卒次必茂女二豐城李杲廬陵文陞其壻孫男二女三曾
孫男三女二異時余參秉江西以修從祖漢高士之祠于東湖固
已起敬公之名節嘗欲列吾宗人之有德有爵者升侑之屬去官
不果會文陞來京師一日致其婦兄之辭曰必茂先親歿且葬有
年而墓道未表大懼隕越無以顯揚惟公中州典刑以詞翰重一

世敢以不朽為請余知公悉且欲著其可鑒者示後來故不復辭而系之辭曰

亡國之臣莫知所亡一或有知國指為狂由異代觀惟狂惟聖我知其人其死無瞑千載而下其言則存刻表墓門示爾子孫

故宋勇勝軍統制官詹侯墓表

吳澂

宋勇勝軍統制官詹侯開慶己未之夏戰死于蜀勇勝軍屯鄂之城外其秋大兵奄至降其軍而侯之妻子在軍中俱北徙子生始四歲時世祖皇帝以親王總兵柄河北董忠獻公從世祖具知侯在蜀力戰不降狀命公曰佳父必生佳兒汝其善護視公鞠誨同己子名之曰士龍既成人仕州縣以廉惠稱追痛其父死節而未白於世常忽忽不樂及擢江南諸道行御史臺監察御史按歷荆楚所至訪其父遺迹有宋士錄國亡之際能城守野戰死者人各為傳而侯與焉得其傳又稽諸故老遺黎退卒之口參伍附益歸以語其友友輯為事狀持示臨川吳澂曰吾父以節死居北之五

年吾母亦死僅存不肖孤一縷之脈大德壬寅冬具衣冠招吾父之魂與吾母合葬鎮江丹徒崇德之硯山懼弗克揚先烈將遂沈沒則終天無涯之痛愈不可塞願有述以表於墓敢以累子澂禮辭許於是讀傳與狀而哀侯之所以死嗚呼歐陽公論五代之臣全節而死者三王彥章其首彥章北面朱梁蓋路人一旦為君臣歲月甚淺鮮無足道而弗貳所事百世之公議猶躓之宋三百年仁義之國豈朱梁比而其季也死宗廟社稷死城郭封疆求如項籍田橫劉湛諸葛瞻顏杲卿張巡許遠南霽雲輩一何寥寥耶侯以下官微祿出入行陳屹屹不挫如此世亦曷常無人哉嗚呼唏矣侯之死以蜀崇慶告急宋大將往援侯率偏師以前破營壘十數攻蜀之帥號紐鄰有善戰聲大將畏憚得小捷遽謀左次以遁侯見帥深入不惑驟領數十騎來往有敵輒迎又喜遠追謂其輕脫可獲也大將逗遛侯率所部獨進進至敘州南平隆化縣界遇游騎什什伯伯接戰無大勝負日中帥以精騎數千至侯之眾不

滿千人皆敢死士馳突衝擊力戰不少懼遣卒請大將求救方引
眾趣山願望竟不赴侯棄所乘馬立射發無不斃帥兵屢卻然以
步敵騎眾寡幾十倍帥兵生力分番迭鬪日昃戰未罷所殺已過
當而侯之兵死傷者十七八矢貫侯臂裂帛裹創復戰連中數十
創創甚矢盡眾稍稍散逸聚者猶數十人傷重莫能軍侯被執帥
壯其勇期生之侯大罵求速死亦不加害翼日帥親視其創饋之
食與藥侯標去弗受絡置馬上載以行八日不食至播州土門逼
令招城中不行遇害年五十二帥還都輒對儔黨言喑喑獎嘆曰
好人好人且曰其箭不可當侯之從子二其一失其名先數歲戍
巴州戰死其一名燦然後數歲要隨州歸師至缺陂戰死堦王杞
守樊城城陷不降亦死一門死者四人侯光州固始人諱鈞少負
奇氣啗齷齪儒弊精神事無用語每云讀書了大意可暇日挾勁
弓驅馬出平原曠野指南北東西射曰大丈夫立功名當以是萬
殿帥器之妻以兒女繇邊郡材技良家子選補軍職隸武定軍屯

光徙屯黃勇勝軍後勅取將於武定而以侯為副其將後走馬襄
陽城上墮城下死侯叱曰大丈夫不為國死敵而死於是兒女子
耳制置使遂以侯代將充統制官寶祐間蜀歲被兵侯往來峽
渠開達等州并禦用少擊眾數數以多最深入蠻徼築建城堡化
服羣獠撫以恩信任事不避艱險類如此捐軀徇國其素志也而
竟以敢戰死嗚呼唏矣夫人萬氏早卒再娶胡氏生士龍士龍之
子澍亦嗜書愿而周於務嗚呼自古忠臣義士身不食其報者往
往報於其子孫然則侯之後宜大蓋已覩其兆

元氏清河新阡表

元明善

元氏有二一曰衛大夫咄一曰拓跋魏魏之元著於河南而吾曾
祖諱興君家于大名之清河譜系無所徵據不得上知族里諱興
君娶彭氏生子曰諱泉君曰諱聚君曰諱海君諱泉君娶張氏生
子曰諱信君諱聚君娶楊氏生子曰諱珍君曰諱成君曰諱玉君
諱海君娶高氏生子曰諱天祐君曰諱進君曰諱瓊君曰諱瑛君

曰諱貢君由將仕佐郎提舉杭州酒使司知事徙蘆瀝鹽場同管
句諱信君娶楊氏生子曰弼曰德曰恭諱珍君娶張氏何氏生子
曰諱良曰衿今將仕郎高郵屯田提舉曰諱林曰榮曰瑩曰滄諱
成君娶趙氏生子曰繼曰善諱玉君娶郭氏生子曰通曰福曰嘉
諱天祐君娶胡氏生子曰珪諱進君娶焦氏生子曰諱或允諱瓊
君娶楊氏生子曰諱山曰顯曰世彥曰世傑曰檜諱瑛君娶張氏
生子曰義曰從政今湖廣行中書省宣使諱貢君娶彌氏生子曰
明善以儒起家由登仕佐郎樞密院照磨爲中書省知管差除掾
弼娶王氏生子曰起良娶李氏生子曰賢曰衡曰衍善娶侯氏生
榮娶丁氏生子曰敏曰懋繼娶楊氏生子曰衡曰衍善娶侯氏生
子曰岫通娶李氏生子曰翰福娶閻氏生子曰幹或允娶孫氏生
子曰秀山娶鄒氏生子曰振世彥娶劉氏生子曰揚世傑娶鄒氏
生子曰播義娶任氏生子曰嶠曰峻明善娶李氏生子曰蒙曰晦
諱興君以下葬于縣城郭西賈莊之東諱天祐君以下別葬新阡

去祖塋西南七十五步仰惟吾祖和厚懿恭懷光弗耀再世而發
于吾考吾兄而明善不肖亦忝朝命執事機要蓋懼夫族大日遠
昧于鏡考而潤先澤此阡表之所由刻也夫祖澤流衍於冥漠之
中緝學勵行命不逮者有焉趨下漸邪而幸振顯者理無是也雖
然益遠益大垂美無窮豈無其人嗚呼元氏子孫其可不鑒于茲

蘇府君墓表

鄧文原

蘇氏世居眞定之眞定縣君之曾大父公彥大父元老父誠咸韞
德弗仕君諱榮祖字顯之益樹善以亢其宗然歲止三十有七實
至元十二年五月十六日也越四十三年爲延祐丁巳君之子志
道官奉直大夫樞密院斷事官經歷秩視五品得追榮其父母由
是制贈榮祖奉直大夫同知中山府事飛騎尉眞定縣男妻吳氏
眞定縣君咸曰天之報施善人信遠益有徵哉志道將刻石墓左
以昭被寵光于無斁其子天爵嘗爲國子生而余職教于茲也以
君之壻劉從道所著居里行業謁子文余其可辭按狀君性穎異

童胤已若成人從鄉人賈先生授業讀書一過輒成誦事大父孝
疾病湯液必親雖躬洩矢弗厭鄉閭益以比古黔婁云大父年高
寢必溫一夕誤火其席大父曰吾孫勿異也然猶肉袒謝罪久之
早嗜學每歸至夜分戒叩戶者勿亟曰大父方安寢也時南北兵
阻售書價視珍貝君得書必手鈔校讎無豪忽舛異迺已歷法自
唐一行師推大衍定歲差法後世多倣用之然司歷或失其傳君
因金大明歷積算爲書數十篇多易其舊其學自經史百氏陰陽
卜筮書靡不研蹟尤邃伊洛之旨必以孝弟忠信爲本嘗曰學貴
適用也故素尚操履有古愿直風會鬻白金於市過友家墜焉友
故收之以觀其志而君神氣自如友徐歸之曰君之量過人遠矣
歲疫鄰有寡人君爲具藥食至舉家全活里閭之昏嫗喪葬者每
從君問禮君援古訓式縷解銖分不爲世俗陰陽家拘忌之說訟
者亦就君持平才諳日聞轉運司辟君領真定稅然非其意也賦
入有常司征者率利其贏君一無所污未期以大父病歸終孝養

者七年而卒大父泣曰天胡奪吾孝孫之亟也朋友族嫗皆戚嗟
相弔明年大父卒越十年夫人吳氏卒夫人宋宣和故家婉婉有
禮節相其夫克慎中饋既廢奉舅姑若夫之存君儀容高潔不事
表襮處昆弟雍睦衣食不先撫諸弟妹族屬咸盡恩意外子姓
羣從指數百獨通財同爨君卒諸弟稍欲分析吳夫人不能止惟
取薄田二頃書數篋皆曰君之教行閩閩若是夫嘗欲辨宗法以
合昭穆建家廟以嚴祭祀設門塾以訓鄉之子弟志未就而歿取
易家人之上九榜其齋曰威如故學者因號威如先生男二人長
卽志道次殤或勸君止一息教宜稍從寬君曰教可以愛弛邪故
志道由憲司戶部樞密中書掾長幕僚司畫諾皆以治辦稱女三
人長壻卽從道次賈玖馮慶孫男五人長天爵力學績文中國子
高等調薊州判官累遷應奉翰林文字承直郎同知制誥兼國史
院編修官餘早世女三人適宮天禎張蒙何安道葬以卒之五日
墓在府北新市鄉新城原從先塋之兆烏乎人情孰不欲貴且壽

也然古之知道者以德崇為貴名不朽為壽而世之高車駟馬以矜華寵鍊氣服食以希高年卒泯滅堙絕者何可勝道其視賤且天者相去得失幾何也若君之年與位皆弗克究厥施而以善終始可不謂賢乎而況教終有裕命數哀榮又可慰顯揚之思於無窮云

安先生墓表

袁桷

嗚呼金蹂宋踰南兩帝並立廢道德性命之說以辨博長雄為詞章發揚稱述率皆誕漫叢雜理偏而氣豪南北崇尚幾無所分別當是時伊洛之學傳南劍至乾道淳熙士知尊其說闡明之朱文公統宗據會纖鉅畢備正學始崇又未幾偽學造謗咸諱其說以售仕于時金將亡各流離自保烏睹所謂經說哉有明其說者獨江漢趙氏私相筆錄尊聞傳信稍自異流俗皇元平江南其書稠載以來保定劉先生因篤志獨行取文公書會萃而甄別之其文精而深其識專以正蓋隆平之興使夫道德同而風俗一不在於

目接耳受而有嗣也劉既死得其傳者曰安君焉君諱熙字敬仲其學汪洋靜邃謂文以載道辭不勝不足以言理故其言修以立於詩章幽而不傷慕貞潔之實將以自任其道者也道散於異端九流證拾於墜簡傳者益遠而書幸具在不知而作者則索於句讀之末旨意斷絕踵謬而莫悟君設對問以辨後作者悔而焚其書左氏悖誕不合經者悉去之續皇極經世書繇元豐至至大三年考家禮為祠堂以奉四世邑人化之教人也以持敬為本解經必毫釐以析果知矣必驗其所行弟子相從者常百餘人出入閭巷佩矩帶規知其為君之弟子其於劉先生也未嘗一見之蓋篤信其書默求以通焉者也劉亦知君足以傳道卒不得見焉君深悲之而於學有但君無憾矣君之先太原離石人五世祖玠仕於金會祖昇不仕祖潛以經童登第金將亡徙真定因居焉戊戌歲詞賦入等占儒籍考松江東宣慰司照磨妣劉氏君少敏悟諸父咸器之素多疾嘗避隱封龍山然卒不得年至大四年五月某日

卒年四十有三娶張氏焦氏子二壘垣女一嫁王氏是歲葬棗城縣安仁鄉先塋之側其卒也翰林學士王公思廉以書唁其父曰自敬仲死詎安氏不幸士林不幸矣有遺文十卷既葬之十三年門人蘇天爵述其事狀踵門曰默菴先生天爵從學實有年先生之德之行願表於墓原使有考楸作而言曰真文忠公德秀與朱文公同里生不及事焉文公之學真實紹之脩食于廟子祠無異辭集賢劉公生愈後闡揚合一劉公功與真公並安君不得見劉公而道實有傳盛矣哉春陵之學四方為有準矣至治三年歲次癸亥二月丁亥翰林直學士奉議大夫知制誥同修國史會稽袁桷表

王伯益墓表

虞集

皇慶癸丑二月某甲子王君伯益卒於京師客舍治書侍御史趙敬父翰林直學士元復初同知彰慶使柳唐佐皆出錢合所與相知者之賻授其妻之兄冀州知事莫正已使治其喪五日始克斂而殯諸城南僧寺其友楊載杜本訪其平生所為詩文傳之又為作畫像贊及著哀詩哭之舉其孤迪補國子生踰月其弟自大名走京師謀歸其柩將以某年月日葬之某地其先塋也載本又謂集宜為文表其墓令後人知為吾伯益所藏云伯益名執謙大名人生數歲入鄉校旬月中已能習盡羣兒所授書問難其師其師為絕席引寘坐側羣兒無敢與並因勸其父某送詣郡學未數月又細其同舍生如鄉校及長其父資之游京師時中書平章卜灰木公翰林唐承旨公有重名當世以人材為己任一見伯益皆曰奇材也不敢以進用常秩浼伯益將言於上擇館閣優重地薦之久之不得如二公志向方符寶典書滿三年常得四品官即以伯益為符寶典書三年竟不得四品官二公相繼去世無為伯益言者柳唐佐為言於張子有平章平章事隆福宮最貴近而雅好文士禮伯益為上客留署其府為徽政院照磨調真定錄事陵州判官改將作院照磨伯益皆漠如也徒日與彰德田衍師孟河閒李

京景山濟南張養浩希孟飲酒賦詩爲神交時人望見之皆以爲古仙異人冀一得遇待爲幸閻承旨時在翰林謂人曰吾聞伯益宜供奉翰林苟有意幸得見之伯益不屑也後十餘年始爲翰林應奉文字承務郎同知制誥兼國史院編修官然伯益竟止是官年才四十八悲哉伯益身長不過數尺不喜騎馬遇好友卽提杖出門竟日去不返顧語妻子以爲常始來京師用橐中金不識記數及貲盡益困至終身亦不以介意於書無不讀於人物治道政術甚明白而未始以辯博自雄遇人無賢不肖皆驩然無間而胸中了不可混長年京城居而所以爲詩簡澹蕭遠如在山林不與人接者常謂人曰吾知吳楚多瑰偉奇絕者當委身往游乃稱吾意耳楊載曰然誠廣伯益以山水之勝視陳子昂李太白未知何如蓋伯益之詩旨意不迫於事物而律法深穩合古作故識者以載爲知言伯益嘗學修金丹求神僊又嘗深坐默究爲禪定雖莫竟其所至然灼不爲外境移奪無疑矣杜本曰伯益人品極高去

世人已遠當得大徹豈不偉歟惜乎年不待之也未卒前一夕猶與客飲酒人家暮歸坐閱案上書夜且半妻孥頗察其有異召醫未至伯益忽拊几卻臥不復言禁鐘不盡一聲趣喚楊載杜本來而復暝嗚呼若伯益者豈非古之所謂超邁不羣者耶方伯益在斂集往哭之見唐佐語莫知事曰莫夫人何以爲生幼女若爲得所歸弱子若爲得所長感慨出涕被面毅然以爲己事一坐皆歔歔不能仰視是以莫知事治棺椁後極堅緻理其家尤備此皆有古道非常人所可及嗟夫觀伯益之得於人如此則伯益之所存可信已烏乎是爲表

稷山段氏阡表

虞集

泰定四年秋天官侍郎段輔出其先世遺文以示集讀而嘆曰嗟夫昔宋失中原文獻墜地蓋爲金者百數十年材名文藝之士相望乎其間至于明道正誼之學則或鮮傳者矣及其亡也禍亂尤甚斯民之生存無幾况學者乎而河東段氏之學獨行乎揅死扶

傷之際卓然一出於正不惑於神怪不畫於浮近有振俗立教之
遺風焉嗚呼可謂善自託於不泯者哉於是輔告集曰維段氏世
居絳之稷山由輔而上遯其可知者爲前宋司理參軍諱應規十
一世矣司理之六世孫爲金武威郡侯諱矩生三子長曰鈞次曰
鏞次曰鐸鐸以正隆進士官至華州防禦使武威所因以得封者
也鏞先卒而二人以文行稱謂之河東二段在防禦時隴西李愈
作武威墓表五世之內名德並著自武威而至于今又六世矣家
學幸可徵焉子爲敘而篆之將刻諸墓道集辱在同朝不敢辭乃
按而書之凡李愈氏已表者不具所具者自鈞始鈞生汝舟汝舟
生恆恆生克已成己修己克已成己之幼也禮部尙書趙公秉文
識之目之曰二妙成己登至大進士第主宜陽簿及內附朝廷特
授平陽提舉學校官不起而克己終隱于家一時諸侯大夫士皆
師尊之各有文集數十卷集所爲讀而興歎者也克己之子三人
思承思誠河中府儒學教授思溫皇子安西王召爲記室參軍不

赴以子輔貴贈中順大夫禮部侍郎上騎都尉追封河東郡伯成
己之子曰思義平陽路儒學教授四子之孫凡十人似英甫彥孚
輔之兄彝經循順其弟也其九人皆仕有祿位獨輔最顯以文行
選應奉翰林三爲御史遍歷陝西江南及中臺以司業教國子生
判太常禮儀院尋貳天官譽名日盛君子有望焉嗚呼自司理君
至于今段氏十一傳凡二百有餘年而代亦三易矣文學之懿前
後相屬豈不偉哉彼以功名富貴赫奕一時者何可勝數然不過
一傳再傳而聲迹俱泯自其子孫有不能知其世視此孰爲得失
哉故爲之銘銘曰
氣蓋世兮慮徧物邈無託兮久焉識眇弱翰兮著微迹何千年兮
如白日翩翩兮弟昆顧余庭兮鞠存嘉遜兮無闕善自託兮斯文
皇肇造兮有區羣村來兮並驅匪伏兮有待視其家兮多書爰維
岳兮潤流斯河世寢顯兮子孫則多邦人有言兮先生之家
張進中墓表
王士熙

貴齒尊老之義尚矣古之有天下者皆養之以求其言居民聞則
爲父師生于治世涵濡德澤故保其生也無傷更事知艱故言之
發也有則厥後三老董公見舉大義之時沛中父老頌歌舞成功
之日斯老者之著明于世者也聖朝建都燕山民物日富八九十
歲翁敦茂龐頌朝廷優之徭役勿事歲時得陞殿上上皇帝壽每
大朝會百官衣朝服鞠躬以進視班次唯謹毋敢越尺寸而諸耆
老高幘博褐從容暇裕以齒後先門者不加誰何俟百官退乃陟
峻陞承清光歸而娛嬉井陌或騎或步更過飲食和氣粹如大駕
出宮則龐眉黃髮序勾陳環衛閒見者咸曰樂哉太平之民也張
進中居京師有年耆老之一也進中字子正善爲筆其爲筆也管
以堅竹毫以鼪鼠極精銳宜書人爭售之由是四方咸知進中名
得其一者以爲珍異而尙方時有所需非進中所爲者不用也進
中自持筆以入必賜以酒年益高被璽書蠲其徭役至八十以終
時延祐七年某月某日也葬宛平縣岡村妻某氏子某余識京師

耆老多矣所敬者唯君及何失失家善織紗縠最能爲詩充然有
得如宋陸務觀可傳也日出買絲常騎驢歌吟道中指意良遠張
君雅重厚毅然有容坐室中自珍其筆有來求之者曰其貌非儒
生雖多予價終不肯出其善者昇之學士先生如淇上王仲謀上
黨宋齊彥吳中趙子昂皆與之善三家皆世稱善書者其知君良
有以夫今何君張君相繼以隕求似者未之見嗚呼生治世以樂
其身不必仕之及也擅一藝以壽其名不必文之多也張君亦何
憾焉揭辭墓前用以告來者

真定張君墓表

宋本

真定之真定縣人曰張君諱德林字茂卿夙喪怙恃兄弟幼且貧
旣長遂贅壻于郡董氏董氏多財無子委君家事君長治生久之
資益饒又哀董宗將絕爲外舅買妾覲有以世其祀果生一子名
笥亡幾何外舅妾皆死君夫婦鞠笥保抱乳哺之壯悉致家貲以
去笥力留同居不可乃與田百畝屋一區爲報君課家人耕蠶以

自衣食至治元年七月十四日病卒年六十四至順二年某月某日葬縣之新市鄉安封原子男一人天佑和寧路儒學正女二人長適朝列大夫監察御史蘇天爵次適郡士宮思敬孫男二中立中和日蘇君持君事狀告予曰昔杭有富民病且死子生甫三歲遺命壻主家產宅時子取三壻取七子長而訟乖崖張公爲守曰使遺命子七則死壻手矣苟無剛明若張公者則子受屈無疑今張君非迫於孤子之愬非慌於官府禁令非不理於鄉黨親戚之口慨然舍所已據遺諸不爭求之時俗亦鮮矣能爲我文以表其墓爲齊民勸乎苟得之將歸刻諸石予諾而未遂蘇君再請三請且歲餘不懈時蘇君室恆山郡君者已亡予憐其拳拳故妻之父若是乃最其事之概附以卒葬歲月子女孫息之數而系以論曰古未有贅壻秦黔首家貧子壯則出贅始見史傳實弊俗也妻之家不以骨肉視贅壻雖贅壻亦自不以我爲妻家骨肉張延賞韋臯猶爾矧餘人乎陽爲翁翁熱而陰相漠然者爭鬪相責望者皆

有之蓋實非骨肉而然也故有國者至發民贅壻爲卒將以用其憤忿不平勤勞困苦之氣耳至財者則又民之心也百金之產出入掌握可沒齒溫飽贅壻於妻之父母之子何有於戲處非骨肉之地當風俗世下之時而張君出焉真鮮哉方以杭民之訟則大非其倫彼富民者懼死其子於己生而君則求董之子於未有詎不相萬萬哉當買妾時君固已無心於其所殖不待推致於笥而後知也然予又有感於蘇君者昔予大父亦壻京師富民張氏張亦無子約曰死後園田屋室金帛皆予物數歲側室育子大父告去張翁媪驚曰何至是縱有子女不當得產之半耶大父曰某不欲處嫌地竟去舊當狀其事洎其餘行實欲求當世有文者表著金石未能也孫於祖顧久有闕然者蘇君乃能以斯先我豈天賞君盡心外舅而生蘇君俾豈弟親親女以君友而取報乎則鄉所謂弊俗者鎮定之間由董張蘇三氏可少湔矣用於世而觀民風者過君墓道以讀是尙有徵焉

元文類卷五十六

元文類卷五十六
神道碑
故金尚書右丞祁律公神道碑
元好問

元文類卷五十七

神道碑

故金尚書右丞祁律公神道碑

元好問

右丞文獻公在大定間所以為通儒為良史為名卿材大夫者其
事未遠當代耆舊尚及見之好問嘗從事史館每見薦紳先生談
近代賢臣莫不以公為稱首公自初入館即被顧問忠言嘉謀不
可一二數及薊州召還世宗始有意大用公於是時汨沒文字閒
者餘二十年其衰且病亦已久矣故財入政府即乞罷未幾果以
不起聞私竊慨歎以為生材為難盡其材為尤難古之人急於拯
世至於分陰為惜歲不我與忽焉有賚志之恨觀姚元崇之薦張
柬之與張嘉貞之所以自薦為可見矣世宗重惜名器百執事之
人必擇焉而後用得人之盛近古所未有至於孤儁偉傑之士困
於資考限於銓選百未一試兀然而空老者抑多矣以公之材當
春秋鼎盛時不能使之極其所至以建久安而隆長治故雖為章

宗所相至論得時行道識者猶以不能亟用爲世宗惜之公諱履字履道遼太祖長子東丹王突欲之七世孫東丹生燕京留守政事令婁國婁國生將軍國隱國隱生太師合魯合魯生太師胡篤胡篤生定遠大將軍內刺生銀靑榮祿大夫興平軍節度使德元公之考曰聿魯興平之族弟也公早孤養於興平五歲時嘗夏夜露臥見天際浮雲往來忽謂乳母言此殆臥看青天行白雲者邪興平聞之驚且喜曰吾兒文性見於此矣自是日知問學讀書一過目輒不忘及長通六經百家之書尤邃於易太玄至於陰陽方技之說歷象推步之術無不洞究善屬文早爲時輩所推爲人美風儀善談論見者懍然敬之嘗以鄉賦一試有司見露索失體卽拂衣去陰補內供奉班尋辟國史院書寫素善契丹大小字譯經潤文旨辭達而理得大定初朝廷無事世宗銳意經籍詔以小字譯唐史成則別以女直字傳之以便觀覽公在選中獨主其事書上大蒙賞異擢國史院編修官兼筆視直長改置經書所徑

以女直字譯漢文選貴胄之秀異就學焉一日世宗召問公朕此讀貞觀政要見魏徵忠諫恨不與之同時近世如徵者獨未之見何也公乃感奮爲上言徵輩不難得特太宗不常有耳世宗曰卿謂我不納諫邪卿識劉用晦張汝霖否二人者皆不應得三品朕以其屢有忠言故越次用之朕豈不納諫邪公曰臣自幼未嘗去朝廷彼二人者誠未見其諫也且海陵杜塞言路天下緘口習以成風願陛下懲艾前弊開忠諫之路以通下情則天下幸甚初議以時務策設女直進士科禮部以所學不同未可槩稱進士詔公定其事乃上議曰進士之科起於隋大業中始試以策唐初因之至高宗時雜以箴銘賦頌文宗始專用賦且進士之初本專策試今女直諸生以試策稱進士又何疑焉世宗說事遂施行十五年授應奉翰林文字兼前職以大明曆積微浸差乃取金國受命之始年譏乙未元曆云自丁巳大明曆行正隆戊寅三月朔日當食而不之食歷家謂必當改作而朝廷不之卹也及大定癸巳五月

朔甲午十一月朔日食皆先天丁酉九月朔乃反後天臣輒跡其
差忒之由冀得中數以傳永久書成上之世推其精密十九年遷
修撰二十年詔提控衍慶宮畫功臣像以稽程降應奉踰年復為
修撰轉尚書禮部員外郎章宗為金源郡王以公該洽每以經史
疑義為質公承問請曰殿下注意何經章宗曰吾方授左氏春秋
公曰左氏雖授經聖人率多權詐駁而不純尚書孟子載聖賢純
一之道願留意焉章宗善之曰醇儒之言也二十六年進本部郎
中兼同修國史翰林修撰表進孝經指解言宋仁宗時司馬光以
為古文孝經先秦所傳正得其真因為指解上之臣愚竊觀近世
皆以兵刑財賦為急而光獨以童蒙所訓者進之君正以孝為百
行之本其至可以通神明動天地為人君者誠取其辭旨措之天
下四方則元元之民受賜溥矣臣竊慕焉故敢以為例世宗母睿
宗貞懿皇后睿宗厭世即為比邱尼當時朝命嘗有國師之號及
是世宗議遷祔于景陵朝臣有以孝甯宮碑所載遺訓當用出家

禮葬不可違改為言者事下禮部講求往時主上在潛貞懿身奉
釋教業已受朝命必當別葬無可議者尚以人情所難恐傷主上
孝心故出明訓使之遵行出於母慈灼然可見本不知有今日之
事而然今則子為天子母后稱號不得不尊國師之命固已革去
矣向使主上登極之後貞懿萬福尊崇之數自有典常母后聖性
明達必不重違有司之請以從桑門之教以此言之碑文所載不
可質於今日明矣從之世宗嘗問宋名臣孰為優公以端明殿學
士蘇軾對世宗曰吾聞蘇軾與駙馬都尉王詵交甚款至作歌曲
戲及帝女非禮之甚其人何足數邪公曰小說傳聞未必可信就
令有之戲笑之間亦何須深責豈得并其人而廢之世徒知軾之
詩文為不可及臣觀其論天下事實經濟之良材求之古人陸贄
而下未見其比陛下無信小說傳聞而忽賢臣之言明日錄軾奏
議上之詔國子監刊行俄以疾求解世宗憫其勞授薊州刺史為
郡寬猛適中旬月之間政聲藹然此州寶坻鹽司所在瀕海之民

煎鹵而食鹽官時以弓兵捕之亦有平民被羅織者一陷於禁往
往爲之破產官吏疾其然凡以鹽事逮捕者一切勿遣或捕得弓
兵則幽之獄中鹽司隨亦取報前後數政不能解一日捕得弓兵
公召僚屬諭以和解之意卽縱遣之口授文移過爲謙抑鹽官大
爲感悅前弊遂革蒞人至今德之是年車駕東狩過州聞公疾稍
平召爲翰林待制同修國史明年擢禮部侍郎兼翰林直學士進
官五階世宗不豫詔公入侍遂預太師淄王定冊之功二十九年
春三月章宗卽位進禮部尚書兼直學士同修國史特賜孟宗獻
榜進士及第初世宗遺詔移梓宮於萬甯宮章宗詔百官議其事
皆謂當以遺詔從事獨公奏曰非禮也天子七月而葬同軌畢至
其可使萬國之臣朝大行於離宮乎上從之乃遷座於大安殿七
月拜參知政事兼修國史進官兩階公辭以才薄任重恐貽天下
笑章宗曰朕在東宮時熟卿名今觀卿言行無不可者故首命相
朕此自朕意非左右爲之先容卿其毋讓公乃拜命自以兼直學

士入拜乃舉前代光院故事以錢五十萬送學士院學者榮之明
昌元年進尚書右丞夏六月丙午春秋六十一薨於位天子聞而
震悼戊申權殯於都城南柳村詔百官會喪中使宣慰其家賜錢
一百萬秋八月辛巳車駕臨奠宰相百官陪賜諡曰文獻賜錢二
百萬帛四百匹重幣四十端九月庚午葬於義州弘政縣東南鄉
先塋之側其發引也勅百官郊送遣使祭於路給鼓旗二十事以
導詔同知臨海軍節度使營護喪事凡飾終之具皆從官給哀榮
終始當世莫及積官正議大夫漆水郡開國公始娶蕭氏遼貴族
再娶郭氏岵山世胄之孫三娶楊氏名士曇之女公以時制人子
之養於諸父者不得別贈所生父官故三夫人皆亦不爲請封子
男三人曰奉國上將軍武廟署令辨才曰龍虎衛上將軍贈工部
尚書善才曰領中書省楚才女三人嫁士族男孫四人鈞鉉鏞鑄
公資通敏善辭令胷懷倜儻有文武志膽酬酢事變若迎刃而解
與人言必盡誠無隱得人一善若出諸己至稱道不絕口推賢讓

能力為引薦後生輩借公餘論多至通顯論事上前是非利病惟
理所在未嘗有所回屈世宗朝御史大夫張景仁領國史公為編
修受詔修海陵實錄他日世宗問侍臣海陵弑熙宗血濺於面露
及衣袖景仁何為隱而不書或曰景仁事海陵頗被任使故為諱
之世宗作色曰朕不謂景仁乃有是心公曰臣與景仁嘗有隙必
不妄為蓋蔽然景仁未嘗有是心也世宗曰景仁與卿何隙曰臣
以小字為史掾景仁以漢文為史官予奪之際意多不相叶且謂
臣藏匿遼史秩滿移文選部使不得調此私隙也今對上問公言
也臣不敢以私害公世宗又曰隋煬帝弑逆血濺於屏史亦書之
卿謂景仁無是心何不如隋史書之曰煬帝自諱其惡故史臣不
載之帝紀而詳見於他傳此所謂闕而章者也海陵以廢昏為辭
明告天下居之不疑此不同也且與之弑君而不辭血濺之罪雖
不書可也世宗怒遂解章宗朝太府少監孛特里先為漢王長史
吏卒苦其苛暴誣以怨望語連漢王有司論當死公上封事言陛

下飛龍之始當以親親為先孛特里之獄本出構成就使實如所
論猶當以漢王之故容之況疑似之間乎書奏即日原之初與平
養公為子後生子震興平捐館悉推家資予之及震卒妻子貧無
以為資復收養之族人有負人債而宦遊不返者公代為輸息者
十年既又無以償遂代償之奉使江左得金直千萬皆散之親舊
旬月而盡薨之日庫錢裁餘二千而已體素臞瘠一旦暴得吐疾
登至委頓家人憂懼不知所為公曰死生如去來人之恆理何憂
懼之有取吾冠服來服之怡然而逝其安常處順又如此晚稱忘
言居士有文數百篇論者獨推其揅著說蓋不階師授而獨得之
者癸卯秋八月中令君使謂好問言先公神道碑泰和末先夫人
教授禁中章宗以魏博霄所撰墓銘為未盡欲喬轉運字為之而
不及也今屬筆於子幸而論次之以俟百世之下好問再拜曰謹
受教乃為之銘曰
德星煌煌出東方讓王七世蔚有光高陽苗裔龔眾芳得易貞幹

書潛剛帝前巍冠講虞唐德音一鳴鳳朝陽謂公不逢相明昌謂公爲逢違所長風后力牧望顏行老之著作暨典常興陵用公殆未嘗邱山萬牛積且僵顧以根闈待豫章繫國短修奚我傷維公之息季獨良不周柱天屹堂堂有來殷士作裸將力挈一世歸壽康沂游推之公不亡千年萬家置冢旁龜石有銘示不忘淵兮漆水其未央

中書令耶律公神道碑

宋子貞

國家之興肇基於朔方惟太祖皇帝以聖德受命恭行天罰馬首所向蔑有能國太宗承之既懷八荒遂定中原薄海內外罔不臣妾於是立大政而建皇極作新宮以朝諸侯蓋將樹不拔之基垂可繼之統者也而公以命世之才值興王之運本之以廊廟之器輔之以天人之學纏緜二紀開濟兩朝贊經綸於草昧之初一制度於安寧之後自任以天下之重屹然如砥柱之在中流用能道濟生靈視千古爲無愧者也公諱楚材字晉卿姓耶律氏遼東丹

王突欲之八世孫王生燕京留守政事令夔國留守生將軍國隱將軍生太師合魯合魯生太師胡篤胡篤生定遠將軍內刺定遠生榮祿大夫興平軍節度使德元始歸金朝其弟聿魯生履興平鞠以爲子遂爲之後以文章行義受知於世宗擢翰林待制再遷禮部侍郎章宗卽位有定策功進禮部尙書參知政事終於尙書右丞諡曰文獻卽公之考也妣楊氏封漆水國夫人公以明昌元年六月二十日生文獻公通術數尤邃太玄私謂所親曰吾年六十而得此子吾家千里駒也他日必成偉器且當爲異國用因取左氏之楚雖有材晉實用之以爲名字公生三歲而孤母夫人楊氏誨育備至稍長知力學年十七書無所不讀爲文有作者氣金制宰相子得試補省掾公不就章宗特賜就試則中甲科考滿授同知開州事貞祐甲戌宣宗南渡丞相完顏承暉留守燕京行尙書省事表公爲左右司員外郎越明年京城不守遂屬國朝太祖素有并吞天下之志嘗訪遼宗室近族至是徵詣行在入見上謂

公曰遼與金爲世讎吾與汝已報之矣公曰臣父祖以來皆嘗北面事之旣爲臣子豈敢復懷貳心讎君父邪上雅重其言處之左右以備咨訪已卯夏六月大軍征西禡旗之際雨雪三尺上惡之公曰此克敵之象也庚辰冬大雷上以問公公曰梭里檀當死中野已而果然梭里檀回鶻王稱也夏人常入斤者以治弓見知乃詫於公曰本朝尙武而明公欲以文進不已左乎公曰且治弓尙須弓匠豈治天下不用治天下匠邪上聞之喜甚自是用公日密初國朝未有厯學而回鶻人奏五月望夕月食公言不食及期果不食明年公奏十月望夜月食回鶻人言不食其夜月食八分上大異之曰汝於天上事尙無不知况人閒事乎壬午夏五月長星見西方上以問公公曰女直國當易主矣逾年而金主死於是每將出征必令公預卜吉凶上亦燒羊髀骨以符之行次東印度國鐵門關侍衛者見一獸鹿形馬尾綠色而獨角能爲人言曰汝君宜早迴上怪而問公公曰此獸名角端日行一萬八千里解四夷

語是惡殺之象蓋上天遣之以告陛下願承天心宥此數國人命實陛下無疆之福上卽日下詔班師丙戌冬十一月靈武下諸將爭掠子女財幣公獨取書數部大黃兩駝而已旣而軍士病疫唯得大黃可愈所活幾萬人其後燕京多盜至駕車行劫有司不能禁時睿宗監國命中使偕公馳傳往治旣至分捕得之皆勢家子其家人輩行賂求免中使惑之欲爲覆奏公執以爲不可曰信安咫尺未下若不懲戒恐致大亂遂刑一十六人京城帖然皆得安枕矣已丑太宗卽位公定冊立儀禮皇族尊長皆令就班列拜尊長之有拜禮蓋自此始諸國來朝者多以冒禁應死公言陛下新登寶位願無污白道子從之蓋國俗尙白以白爲吉故也時天下新定未有號令所在長吏皆得自專生殺少有忤意則刀鋸隨之至有全室被戮襁褓不遺者而彼州此郡動輒興兵相攻公首以爲言皆禁絕之自太祖西征之後倉廩府庫無斗粟尺帛而中使別迭等僉言雖得漢人亦無所用不若盡去之使草木暢茂以爲

牧地公卽前曰夫以天下之廣四海之富何求而不得但不爲耳
何名無用哉因奏地稅商稅酒醋鹽鐵山澤之利周歲可得銀五
十萬兩絹八萬匹粟四十萬石上曰誠如卿言則國用有餘矣卿
試爲之乃奏立十路課稅所設使副二員皆以儒者爲之如燕京
陳時可宣德路劉中皆天下之選因時時進說周孔之教且謂天
下雖得之馬上不可以馬上治上深以爲然國朝之用文臣蓋自
公發之先是諸路長吏兼領軍民錢穀往往恃其富強肆爲不法
公奏長吏專理民事萬戶府總軍政課稅所掌錢穀各不相統攝
遂爲定制權貴不能平燕京路長官石抹咸得不激怒皇叔但專
使來奏謂公悉用南朝舊人且渠親屬在彼恐有異志不宜重用
且以國朝所忌誣構百端必欲置之死地事連諸執政時鎮海黏
合重山實爲同列爲之股慄曰何必強爲更張計必有今日事公
曰自立朝廷以來每事皆我爲之諸公何與焉若果獲罪我自當
之必不相累上察見其誣怒逐來使不數月曾有以事告咸得不

者上知與公不協特命鞠治公奏曰此人倨傲無禮狎近羣小易
以招謗今方有事於南方他日治之亦未爲晚上頗不悅已而謂
侍臣曰君子人也汝曹當效之辛卯秋八月上至雲中諸路所貢
課額銀幣及倉廩米穀簿籍具陳於前悉符元奏之數上笑曰卿
不離朕左右何以能使錢穀流入如此不審南國復有卿比者否
公曰賢於臣者甚多以臣不才故留於燕上親酌大觴以賜之卽
日授中書省印俾領其事無巨細一以委之宣德路長官太傅
禿花失陷官糧萬餘石恃其勳舊密奏求免上問中書知否對曰
不知上取鳴鏑欲射者再良久叱出使白中書省償之仍勅今後
凡事先白中書然後聞奏中貴苦木思不花奏撥戶一萬以爲采
鍊金銀栽種蒲萄等戶公言太祖有旨山後百姓與本朝人無異
兵賦所出緩急得用不若將河南殘民貸而不誅可充此役且以
寶山後之地土曰卿言是也又奏諸路民戶今已疫乏宜令土居
蒙古回鶻河西人等與所在居民一體應輸賦役皆施行之壬辰

車駕至河南詔陝洛秦虢等州山林洞穴逃匿之人若迎軍來降與免殺戮或謂此輩急則來附緩則復資敵耳公奏給旗數百面悉令散歸已降之郡其活不可勝數國制凡敵人拒命矢口一發則殺無赦汴京垂陷首將速不斛遣人來報且言此城相抗日久多殺傷士卒意欲盡屠之公馳入奏曰將士暴露凡數十年所爭者地土人民耳得地無民將焉用之上疑而未決復奏曰凡弓矢甲仗金玉等匠及官民富貴之家皆聚此城中殺之則一無所得是徒勞也上始然之詔除完顏氏一族外餘皆原免時避兵在汴者戶一百四十七萬仍奏選工匠儒釋道醫卜之流散居河北官爲給贍其後攻取淮漢諸城因爲定例初汴京未下奏遣使入城索取孔子五十一代孫襲封衍聖公元措令收拾散亡禮樂人等及取名儒梁陟等數輩於燕京置編修所平陽置經籍所以開文治時河南初破被俘虜者不可勝計及聞大軍北還逃去者十八九有詔停留逃民及資給飲食者皆死無問城郭保社一家犯禁

餘並連坐由是百姓惶駭雖父子弟兄一經俘虜不敢正視逃民無所得食踏死道路者踵相躡也公從容進說曰十餘年間存撫百姓以其有用故也若勝負未分慮涉攜貳今敵國已破去將安往豈有因一俘囚罪數百人者乎上悟詔停其禁金國既亡唯秦鞏等二十餘州連歲不下公奏吾人之得罪逃入金國者皆萃於此其所以力戰者蓋懼死耳若許以不殺不攻而自下矣詔下皆開門出降期月之間山外悉平甲午詔括戶口以大臣忽覩虎領之國初方事進取所降下者因以與之自一社一民各有所主不相統屬至是始隸州縣朝臣其欲以丁爲戶公獨以爲不可皆曰我朝及西域諸國莫不以丁爲戶豈可捨大朝之法而從亡國政邪公曰自古有中原者未嘗以丁爲戶若果行之可輸一年之賦隨即逃散矣卒從公議時諸王大臣及諸將校所得驅口往往寄留諸郡幾居天下之半公因奏括戶口皆籍爲編民乙未朝議以回鶻人征南漢人征西以爲得計公極言其不可曰漢地西域相

去數萬里比至敵境人馬疲乏不堪爲用況水土異宜必先疾疫不若各就本土征進似爲兩便爭論十餘日其議遂寢丙申上會諸王貴臣親執觴以賜公曰朕之所以推誠任卿者先帝之命也非卿則天下亦無今日朕之所以得高枕而臥者卿之力也蓋太祖晚年屢屬於上曰此人天賜我家汝他日國政當悉委之其秋七月忽覩虎以戶口來上議割裂諸州郡分賜諸王貴族以爲湯沐邑公曰尾大不掉易以生隙不如多與金帛足以爲恩上曰業已許之復曰若樹置官吏必自朝命除恆賦外不令擅自徵斂差可久矣從之是歲始定天下賦稅等二戶出絲一斤以供官用王戶出絲一斤以與所賜之家上田每畝稅三升半中田三升下田二升水田五升商稅三十分之一鹽每銀一兩四十斤已上以爲永額朝臣皆謂太輕公曰將來必有以利進者則已爲重矣國初盜賊充斥商賈不能行則下令凡有失盜去處周歲不獲正賊令本路民戶代償其物前後積累動以萬計及所在官吏取借回鶻

債銀其年則倍之次年則并息又倍之謂之羊羔利積而不已往往破家散族至以妻子爲質然終不能償公爲請於上悉以官銀代還凡七萬六千定仍奏定今後不以歲月遠近予本相俸更不生息遂爲定制侍臣脫歡奏選室女勅中書省發詔行之公持之不下上怒召問其故公曰向所刷室女二十八人尙在燕京足備後宮使令而脫歡傳旨又欲徧行選刷臣恐重擾百姓欲覆奏陛下耳上良久曰可遂罷之又欲於漢地拘刷牝馬公言漢地所有繭絲五穀耳非產馬之地若今日行之後必爲例是徒擾天下也乃從其請丁酉汰三教僧道試經通者給牒受戒許居寺觀儒人中選者則復其家公初言僧道中避役者多合行選試至是始行之始諸王貴戚皆得自起驛馬而使臣猥多馬悉倒乏則豪奪民馬以乘之城郭道路所至騷動及其到館則要索百端供饋稍緩輒被箠撻館人不能堪公奏給牌劄仍定飲食分例其弊始革因陳時務十策一曰信賞罰二曰正名分三曰給俸祿四曰封功臣

五曰考殿最六曰定物力七曰汰工匠八曰務農桑九曰定上貢
十曰置水運上雖不能盡行亦時擇用焉回鶻阿散阿迷失告公
私用官銀一千定上召問公公曰陛下試詳思之曾有旨用銀否
上曰朕亦憶得嘗令修蓋宮殿用銀一千定公曰是也後數日上
坐萬安殿召阿散阿迷失詰之遂服其誣太原路課稅使副以贓
罪聞上讓公曰卿言孔子之教可行儒者皆善人何故亦有此輩
公曰君父之教臣子豈欲陷之於不義而不義者亦時有之三綱
五常之教有國有家者莫不由之如天之有日月星辰也豈可因
一人之有過使萬世常行之道獨見廢於我朝乎上意乃解戊戌
天下大旱蝗上問公以禦之之術公曰今年租賦乞權行倚閣上
曰恐國用不足公曰倉庫見在可支十年許之初籍天下戶得一
百四萬至是逃亡者十四五而賦仍舊天下病之公奏除逃戶三
十五萬民賴以安燕京劉忽篤馬者陰結權貴以銀五十萬兩撲
買天下差發涉獵發丁者以銀二十五萬兩撲買天下係官廊房

地基水利豬雞劉庭王者以銀五萬兩撲買燕京酒課又有回鶻
以銀一百萬兩撲買天下鹽課至有撲買天下河泊橋梁渡口者
公曰此皆姦人欺下罔上為害甚大咸奏罷之嘗曰興一利不若
除一害生一事不若減一事人必以為班超之言蓋平平耳千古
之下自有定論上素嗜酒晚年尤甚日與諸大臣酣飲公數諫不
聽乃持酒槽之金口曰此鐵為酒所蝕尙致如此況人之五臟有
不損耶上悅賜以金帛仍勅左右日進酒三鍾而止時四方無虞
上頗怠於政事姦邪得以乘間而入初公自庚寅年定課稅所額
每歲銀一萬定及河南既下戶口滋息增至二萬二千定而回鶻
譯史安天合至自汴梁倒身事公以求進用公雖加獎借終不能
滿望即奔詣鎮海百計行間首引回鶻與都刺合蠻撲買課稅增
至四萬四千定公曰雖取四十四萬亦可得不過嚴設法禁陰奪
民利耳民窮為盜非國之福而近侍左右皆為所啗上亦頗惑眾
議欲令試行之公反復爭論聲色俱厲上曰汝欲鬪搏耶公力不

能奪乃太息曰撲買之利既興必有躡跡而篡其後者民之窮困將自此始於是政出多門矣公正色立朝不爲少屈欲以身徇天下每陳國家利病生民休戚辭氣懇切孜孜不已上曰汝又欲爲百姓哭耶然待公加重公當國日久每以所得祿賜分散宗族未嘗私以官爵或勸以乘時廣布枝葉固本之術也公曰金幣資給足以樂生若假之官守設有不肖者干違常憲吾不能廢公法而徇私情且狡兔三穴吾不爲也辛丑春二月上疾篤脈絕皇后不知所以召公問之公曰今朝廷用非其人天下罪囚必多冤枉故天變屢見宜大赦天下因引宋景公熒惑退舍之事以爲證后亟欲行之公曰非君命不可頃之上少蘇后以爲奏上不能言頷之而已赦發脈復生冬十一月上勿藥已久公以太一數推之奏不宜畋獵左右皆曰若不騎射何以爲樂獵五日而崩癸卯后以儲嗣問公公曰此非外姓臣所當議自有先帝遺詔在遵之則社稷幸甚奧都刺合蠻方以貨取朝政執政者亦皆阿附唯憚公沮其

事則以銀五萬兩賂公公不受事有不便於民者輒中止之時后已稱制則以御寶空紙付奧都刺合蠻令從意書填公奏曰天下先帝之天下典章號令自先帝出必欲如此臣不敢奉詔尋復有旨奧都刺合蠻奏準事理令史若不書填則斷其手公曰軍國之事先帝悉委老臣令史何與焉事若合理自是遵行若不合理死且不避況斷手乎因厲聲曰老臣事太祖太宗三十餘年固不負於國家皇后亦不能以無罪殺臣后雖怨其忤已亦以先朝勳舊曲加敬憚焉公以其年五月十有四日以疾薨於位享年五十五蒙古諸人哭之如喪其親戚和林爲之罷市絕音樂者數日天下士大夫莫不涕泣相弔以中統二年十月二十日葬於玉泉東壅山之陽從遺命也以漆水國夫人蘇氏祔先娶梁氏以兵亂隔絕歿於河南之方城生子鉉監開平倉卒蘇氏東坡先生四世孫威州刺史公弼之女生子鑄今爲中書左丞相孫男十一人曰希徵曰希勃曰希亮曰希寬曰希素曰希周曰希光曰希逸曰希

希 曰希 女孫五人適貴族公天姿英邁迥出人表雖案牘滿前左酬右答咸適其當又能以忠勤自將嘗會計天下九年之賦毫釐有差則通宵不寐平居不妄言笑疑若簡傲及一被接納則和氣溫溫令人不能忘平生不治生產家財未嘗問其出入及其薨也人有譖之者曰公爲相二十年天下貢奉皆入私門后使衛士視之唯名琴數張金石遺文數百卷而已篤於好學不舍晝夜嘗誡諸子曰公務雖多書則屬官夜則屬私亦可學也其學務爲該洽凡星歷醫卜雜算內算音律儒釋異國之書無不通究嘗言西域歷五星密於中國乃作麻答把歷蓋回鶻歷名也又以日食躔度與中國不同以大明歷浸差故也乃定文獻公所著乙未元歷行於世既葬公七年令丞相持進士趙衍狀以銘見屬國家承大亂之後天綱絕地軸折人理滅所謂更造夫婦肇有父子者信有之矣加以南北之政每每相戾其出入用事者又皆諸國之人言語之不通趣向之不同當是之時而公以一書生孤立於廟堂

之上而欲行其所學莫乎其難哉幸賴明天子在上諫行言聽故奮袂直前力行而不顧然而其見於設施者十不能二三而天下之人固已鈞受其賜矣若此時非公則人之類又不知其何如耳銘曰

帝王之興輔弼是賴誰其尸之不約而會阿衡返商尙父歸周風雲一旦竹帛千秋赤氣告祥龍飛朔野義師長驅削平天下儒服從容左右彌縫或誠厥功惟中令公令公維何代掌燮理太師之孫文獻之子白璧堂維國之華帝曰斯人天賜我家重明耀離大命既革乾旋坤轉如再開闢內外疇咨付之鈞司吾國吾民汝翼汝爲公拜稽首曰敢不力權輿帝墳草創人極郡國相師以殺爲嬉陰盜赤子弄兵潢池渙號一布捷於風雨指麾羣雄罔豹檻虎賢哲深藏固拒牢關潛行公卿求活草閒隨材擇用鬱爲棟網羅四方狩麟蒐鳳府庫填充粟帛流通公於是時蕭何關中臺閣討裁典章燦煥公於是時玄齡貞觀逋俘纍纍蔽野僵屍我燠

元文類卷五十七
而寒我飽而飢圍城惴惴假息寸晷我解其縛我生其死生息長
養教誨飲食民到于今家受其賜惟天雖高其監則明乃祚元子
再秉樞衡勳在盟府名昭國史富貴壽考哀榮終始莓莓新阡浩
浩流泉不朽載傳尚千萬年

元文類卷五十七

